

文恭集
二



文 恭 集
(二)

胡 宿 撰

文恭集卷六

五言排律

明堂大禮

路寢尊嚴配。明廷攷舊圖。房心通氣象。太紫狀規模。翊衛多儀縟。齋祠至信孚。蓬羞甘菲薄。鼎味卻鮮腍。日月垂天象。鸞龍奮寶跗。樂均諧睿律。禮蔭潤宸謨。劍佩千官拱。梯航四海趨。謙恭虛小次。登降謹黃衢。德盛三靈格。恩流萬物蘇。甘泉陪法從。千載喜歌虞。

禮畢慶成

路寢凝中字。星文直大辰。總章裁往範。齋駕奉明禋。惟聖能嚴父。於皇重饗親。永懷深肅儉。昭事極精純。鍾律咸韶古。衣冠黼黻新。九金徠貢職。萬玉儼朝倫。夷夏觀殊禮。乾祇享至仁。參祠七世廟。再降六天神。萬寶成秋野。千祥擁禁宸。睿恩覃四海。壽域躋斯民。

召赴天章寶文閣觀御集賜御書飛白扇子美玉殿錫宴

阿閣藏仙籍。英輿侍辟儀。珍函開二典。聖藻煥重離。河洛斯文在。盤盂乃訓垂。寶跗親許視。瑞物徧容窺。

白鳳隨毫舉蒼龍應墨奇。好文逢漢后。觀象值庖犧。溢幅榮分賜。班觴曲示慈。柏梁晨煦洽。仙莢晝陰移。和樂韶音美。承平鎬酒遲。再陪瑤水宴。千載慶茲時。

館中錫宴

紫殿程書廣。鴻都校籍成。宸心瞻儒學。慈宴詔樞衡。供帳來金闕。臚傳下玉京。三山開祕宿。七閣敞修楹。革履趨朝暇。華貂映席明。弁繁星錯落。佩雜玉鏘鳴。爐靜飄芳蕙。圖開譏禁橙。近有恩旨。降瑞橙一本。付之祕閣。壹均天所酒。鼎薦帝餘羹。夏屋彰仁洽。衢樽樂治平。丹樓晨唱近。碧樹曉寒輕。宇內年書有人間。月就盈。非煙舒渥旨。愛日助皇情。鳧藻深歡意。魚蒲溢頌聲。蕭斯蒙湛湛。露彼仰英英。故事留東觀。崇恩自上卿。何言挈瓶陋。亦玷舉觴榮。已重高門地。還歌食野苹。微生徒棗鈍。弱植但葵傾。就日欣逢旦。瞻河喜見清。更期紆翠葆。千載詔登瀛。

詔祀西太一宮

至道希夷內。神威造化中。行基延羽駕。推策儼琳宮。祕寢觚稜峻。嚴扉坐狄雄。天人凝睟表。日月在方瞳。離坎精神集。房心氣象通。中黃安戊己。遙翠拱崕嵩。陪享衣裳盛。登羞火棗豐。層壇霏顯露。甲帳肅靈風。波靜流寒瓦。霜清入曉銅。廊虛鳴尺蠖。樓迴倚晴虹。行馬依芳樹。棲禽占碧叢。游光宵自燭。雕甍晝常濛。大壯觀規近。甘泉舊典崇。平時關閭闔。盡日訪崆峒。綵仗交輪奐。天香闕鬱葱。野長迷七聖。庭闕舞千童。禋幣歆惟德。笙歌悅亶聰。蟠螭負金石。翔鶴下絲桐。法度昭神祖。祀禮科儀。悉用雍熙之舊。文章炳鉅公。鼎期扶更。

遠山瑞委無窮。用九乾元正。生三太極空。木龍雖有寓。芻狗本無功。迎氣陽郊始。均禧宇縣同。權衡樞極右。號令斗杓東。濬哲虔時祀。施生道化工。正辭除祕祝。承詔謁孤忠。仁與春膏動。恩隨臘霰融。天和傍星鳥。地惠及昆蟲。受記神司職。齋居帝飭躬。因知耕鑿力。誰解識淵衷。

郊丘侍祀

太極生眞主。中原有聖人。圜丘尊上帝。大旅合羣神。行馬帷宮肅。乘龍法駕馴。禮容光日月。文德動星辰。劍履陪祠古。咸英作樂新。東方虛小次。午陛徹華茵。吉土繇誠享。高穹以道親。燭壇光景集。升燎福祥臻。寒霽三冬日。恩融四海春。萬靈今受記。長此奉堯仁。

奉貢殿山亭奉詔觀橙

弄色金橙熟。朝元玉軟襄。寶奩登美實。齋蹕駐清光。高葉參雲碧。繁苞壓樹黃。鮮明當早旭。採摘有新霜。原廟已云薦。大家猶未嘗。分頒顏在咫。捧拜手盈香。凡果深何幸。孤根遠見將。五行舍戊己。二水出瀟湘。來植清琳館。叨升白璧堂。更依仙掌側。日夕近芬芳。

西圃櫻桃

一春紅日色。刻意借鮮妍。露葉深成翳。風枝猛欲燃。黃金爲彈重。赤水得珠圓。甘實行宮薦。香名麗賦傳。色欺丹魄上。味出紫梨前。玉果誇珍實。何曾入象筵。

和蔡君謨閣前紫柏

秀植登中禁。靈根記大方。纖枝乘十雨。勁節蓄千霜。雲幹仍稠直。煙華稍鬱蒼。綠陰疎未合。翠蓋儼相望。青質從新甫。標名壓豫章。三休依寶構。一溉引天潢。瑞露通晨旭。靈風繞夜翔。靈潭驚閣燭。啼狖憶巖光。地惠覃行葦。人情樂樹楊。保無禽鹿踐。知免斧斤傷。遠勢興毫末。孤標出衆芳。寒葭寧可倚。幽草固難藏。庭鶴宜留側。臺烏莫近傍。未經鸞隱葉。不使麝居香。松操同凌雪。葵心共向陽。故情存潤壑。生意屬池隍。畫景斜臨石。禪機俯映堂。頌傳商廟桷。材入漢家梁。此世隆三代。何時構九房。瓊姿天所產。工度未應忘。後苑觀雙竹。

瑞植昭天產。祥枝感帝臨。均承元化力。同抱歲寒心。異稟笙簫質。全包律呂音。孤根皆出地。勁節約成林。蒙潤非煙近。含滋御水深。風前交吐穎。月底互翻陰。秋實思威鳳。春條宿綺禽。留觀停翠葆。託賞集華簪。蒼震猶乘卦。商巖近作霖。天支從此茂。長覆玉山岑。

昭應宮小桃

艷冶如無罪。何由譴絳宮。不因輕阿姥。卽是小仙公。丹臉翻啼雨。飛書卻寄風。春溪迷柳曲。午影過牆東。密葉輕籠翠。繁陰半露紅。誰驚幽鳥散。千片觸簾櫳。

吳興秋晚郡齋長句

霽色初休雨。寒梅稍欲霜。噉噉驚日晏。嶼嶼喜年康。菰米迎冬熟。萍醅破社嘗。響聲寄檻冷。卞色入樓蒼。弱援垂榴臉。幽叢亞菊芳。牛羊馴沃野。鴈鷺悅滄浪。水市能爲楫。田家乞有漿。溪音擊競去。村語醉相將。

自昔分天塹。茲州介水坊。賈絲標禹土。錯繡接吳疆。佳麗南朝後。鮮明茂苑旁。風華在安石。交物有東陽。
柳客詩名馥。顏公筆勢翔。山川爲吐氣。日月欲爭光。異代虛墳柏。逢辰濫郡章。壤歌知自化。符守信非良。
勇爵思長劍。高謨乏智囊。葵心拱宸極。藿食念巖廊。西戎方疲陝。中原久患羌。邊人思李牧。天子問中郎。
臣僕今三世。腥羶彼一荒。山西雄占隴。河曲斗分潢。漢始城張掖。秦初地朔方。限戎深得策。遮寇大爲防。
小雅亡于晉。中興屬在唐。太宗神且武。貞觀粹而王。都雍三才直。安西萬里長。聲明冒葱雪。亭堠徹甘涼。
聖術初無敵。孫謀本克臧。末塗虧繼守。駿命亦頽喪。上帝歆炎宋。真人奮大梁。鑿乾分上下。操斗運中央。
殺氣西刑馬。妖氛北隕狼。三關收朔漠。兩鎮復河隍。龍虎其文炳。雷霆我武揚。商球傳聖弟。夏鼎授儲皇。
託付神規遠。彌綸治具詳。四維嚴幅正。八柄謹低昂。地廣藁莽出。海深神怪彰。遺雛偷嘯聚。雜種學跳梁。
王者輕分土。仁人重納隍。猶如棄鱗介。不使易衣裳。禍亂收凶器。昇平隱上庠。躊躇林通好。固狡穴送誠忙。
圭幣修歡聘。金行戢怒芒。生民去湯火。塞土徧耕桑。月窟頒正朔。雲封刻美祥。大璫貽燕翼。下武寢明昌。
區外蒙冠帶。天中布典常。三雍宜雅頌。九譯走梯航。仙致昭華玉。神來弱水香。路車均奕奕。朱芾賜煌煌。
南面存亡國。西平拂肯堂。虎臣無備禦。狼子有包藏。竊欲屯蜂蟻。私相署犬羊。癡言天可上。愚謂日無亡。
傳箭招廬帳。推鋒逆頡行。〔案〕推鋒二字。見漢書樊王傳。原本誤作推鋒。今改正。三河煩調度。六郡苦瘡傷。旅力雖疲曳。游魂
尙頡頏。寢謀思汲黯。禽獸想陳湯。多士皆方領。孤生特面牆。荊官尸禮闕。蜚職玷文房。無策均宵旰。何階
致富強。分從高閣束。敢避要途當。鈴下居無事。樊中脫未遑。鱸魚知味美。鷓鴣信機忘。漢落才何取。支離

臂自攘。雖貪紆紫樂。豈免頓纓狂。感慨乘軒鶴。吁嗟拒轍螳。山河賞吳起。社稷歎量汪。華夏崇基本。朝廷總政綱。弓偏宜舉抑。琴緩在更張。陽德銷羣慝。天元乘至剛。偃兵誠未易。用武亦何妨。雪近思王國。雲閒憶帝鄉。何時聞露布。稱薦萬年觴。

題沃洲亭

句水聲東轉。昭山勢北回。三洲環白浪。一徑踏青苔。牖對遙岑敞。門迎別嶼開。鷗鵬如舊識。蘿桂是新栽。野氣霏霏入。川華剌剌來。老猿偷熟果。馴鴿下生臺。樵斧鳴岑寂。魚扉映曲隈。觀濠立莊惠。結社坐宗雷。格磔歸禽亂。嘔啞去櫓哀。看雲秋徙倚。弄月夜徘徊。珠且矜圓折。犀休銜辟埃。沃洲應祗爾。何用憶天台。

荷花

露夕僊葩卷。風晨寶艷開。妖縈夏庭出。禍水漢宮來。玉冷埋秋骨。珠寒斂夜胎。河分龍浪灌。月借藥淵栽。神機能淩水。僊裙不惹埃。文魚纔可戲。鳩鳥莫爲媒。卻死熬香釜。延年刻壽杯。息嬌今不語。猶尙怨荆臺。

菁菁在中泚

周雅傳遺詠。菁莪播淑聲。育材方被化。在泚自敷榮。得地徧蒙潤。乘時竝擢英。託根分曲渚。入學隸司成。行葦仁同洽。山萊詠可并。聖恩均雨露。挺質愧微生。

釣臺

遺魄知何許。孤風不可攀。星辰歸碧落。道德寄青山。堯舜鐫銖內。巢由爾汝間。草萊升御榻。韋布揖龍顏。

圭組無由屈。煙蘿卻自還。巖峯雲冉冉。數里水潺潺。孤竹清何隘。磻溪老未閒。獨留冰雪操。千古凜人寰。

送黃孝先

日下東京旅。才華變世雄。高門真偉器。正始得遺風。鳴玉來江表。英聲滿洛中。銀鉤專墨妙。犀柄擅談叢。一札公車詔。千鈞鑾相弓。卿才歸樸斲。英毅入牢籠。佛寺題名塔。天家奏試宮。鶴鷄有短羽。亦恐附鸞鴻。

送校理薛學士

帝設英雄轍。朝多俊乂官。玉羈收汗血。珠網獲飛鸞。仙籍分丹桂。香名薦秀蘭。新從平樂試。入奉柏梁歡。辨色趨霜戟。催班近露盤。閣芸開縹帙。堤柳據歸鞍。詩就雞林買。書成太乙觀。行聞延體貌。坡上有金鑾。

和原甫侍讀從幸後苑觀稻之什

稼殿秋香熟。煙畦早景鮮。玉虬乘暇日。銅雀報豐年。壓地黃雲重。含風寶粒堅。三登繫帝力。一豫俯天田。幸廁標章讀。仍陪從蹕宣。賜禾知禮厚。視草覺恩偏。學士兼侍讀乃預此召。簾席思前問。經帷惜外遷。後漢楊秉出耐黃瓊惜其去。上言勸講帷幄不宜外遷。留拜光祿大夫。妙詩深雅意。王政食爲先。

送梅堯臣宰建德

縣枕秋江側。銅章滯雋旄。長安去日遠。單父戴星勞。口水遙通楫。嵐峯欲妒袍。文絃一琴古。仙鳥兩鳬高。家樹喧朝鵲。鄉亭寂夜檠。土風清是楚。才意苦于騷。訟少停徵索。吟多費健毫。平時洛中社。相憶醉含桃。

送劉學士出守衡陽

需奏登中掖。除書出上臺。獸隨朝帶結。筆映使旌開。地接朱陵近。人從藏室來。靈輿侵舊帙。浮蟻入離杯。嶺勢遙連楚。星文卻視魁。雲依蒼野住。鴈隔楚峯回。夕夢驚湘瑟。春心託隴梅。南方本寬教。東里復多才。新勝試吏多在勝中。駟馬榮星駕。千金慶壽臺。未應嗟遠守。素志在循陔。

送蘇賢良之任豫章

三道膠西策。詳延俯瑞英。帝臨宣室坐。人拱太微庭。捷思誰加點。危言自據經。文成洛紙貴。詔下武泥馨。〔案〕武泥二字。不經見。當卽是漢時武都紫泥封詔事。截用之。起草分宮筆。監州駕屏星。心存雲氣關。夢繞斧文屏。南國標江紀。西山占地靈。檻泉通水府。牕戶接巖扃。涼月依滕閣。孤風泊孺亭。案書休犯慮。齋酒且忘形。界道宮牆紫。規蒲禁地青。歸來開院直。鼇頂架滄溟。

送刁總赴句容簿

佳邑控江湄。春來赴牒歸。波平雙槳渡。日上亂鶯飛。狎野晨耕早。蹊田晝訟稀。縣圖標地肺。家巷接烏衣。沼靜窺珍羽。樓閒數翠微。山香蒸飢熟。溪藥摘蓴肥。有客懷金社。因君拂玉徽。嵩雲南去遠。猶向柳依依。

送劉閱東遊

臯壤乏生涯。羈遊越絕賒。一區揚子宅。四壁長卿家。困粟知誰指。囊錢苦自嗟。秋林驚脫葉。夕枕怨啼鴉。海月隨孤棹。天風曳落霞。山城饒露蔓。水驛遍霜葭。孝子蘭方秀。先生菊未華。楚轅無久滯。把酒待回車。

江城立春

天上陽旂舉。人間漏箭長。稍驚池面綠。初覺柳腰黃。暹日延三舍。條風振百昌。酒凝前臘味。梅帶故年芳。雪意思王囿。雲情憶帝鄉。青門行樂處。漸近好煙光。

賞花釣魚應制

平圃回天仗。昆池降帝輿。晨葩纔隱蝶。新藻復藏魚。露重香英濕。風長釣線舒。乳鶯遷谷近。朱鮪躍淵初。禹律鏗金奏。堯樽徧石渠。乘時覃惠宴。不是樂觀魚。

辛夷

百卉迎韶律。辛夷花最先。與春宜有舊。造物底無偏。棠棣先饒韓。山櫻未敢燃。倚風遙可愛。犯雪不勝妍。影亂梅花地。香迷豆蔻天。紅啼昨夜雨。紫妬曉來煙。上藥能全命。靈滋合永年。帝家瓊圃在。此物未應捐。

館中同舍城西小飲

信馬斗西城。芳郊春漸熙。早煙銷禁樹。初溜入天池。桃作新正臉。梅留故臘枝。麝香浮蟻日。村翳浴蠶時。聊把今朝臂。同伸卽席眉。徘徊惜歸馭。風晚水生漪。

講畢周禮詔賜御筵

典禮惟周舊。經文在魯餘。西清開縹帙。東面授丹書。訪道前簾席。崇風厚石渠。研覃忘日旰。圖繪極霞舒。經中禮樂之器。昭圖繪其狀。千載逢亨際。三冬罷講初。聖懷輕壁馬。慈宴樂蒲魚。妙技通神細。清商按曲徐。爐香分漢殿。鼎味出堯除。諸先恩同醉。孤臣藝最疎。至仁何以報。忠義卽瓊琚。

丁巳歲觀玉皇冊禮

寶冊尊徽號。香泥潔武都。齋心期太乙。恭已答元符。玉輅嚴清制。琅函祕聖謨。竹宮陳帝拜。嵩極動神呼。彩霧霏三境。祥輝燭九區。況當精歲出。仍與上辛俱。正旦上辛協吉之符永接千齡統。長膺五老圖。清編流景鑑。禮自百王無。

溪竹

可愛壇東竹。更籠清淺流。行根侵島嶼。脫籜滿汀洲。夜迴疑篩月。風多欲戰秋。紫莖同入畫。青石伴垂鉤。葉裏藏雌翠。陰中下戲鷗。秦松無用笑。千畝更封侯。

五言絕句

憶東園

越鳥戀南柯。春來怨別多。冷風如可御。爭奈簡書何。

橫山

此地橫青嶂。當年動紫氛。將軍精爽在。可解勒遺文。〔案〕此詩永樂大典失載。今據宋詩選本補入。

七言絕句

漫成

日醉風酣百卉開。錦韉爭躍大隄來。城東有客歌盆久。不敢將春上老臺。
齋祠小飲資政吳侍郎。以真如茶二絕句爲寄。

碧城齋禁放朝元。晚飲偷消白日閒。天上高真潛謁得。因將瑤藻擲雲間。
寶刀玉尺裁佳句。雪溜雲腴試早芽。睡魄頓消清到骨。一成僧味似僧家。

劉開府

京口劉郎是穆之。風雲未作苦棲遲。金盤一石檳榔贈。可得當年是諱饑。

館娃宮

犀甲三千越騎雄。平明來襲館娃宮。君王不得西施去。萬戶那能住甬東。

自嘲

雪梅連日礙層陰。昨夜銀臺瑞霰深。待詔多年無展齒。牕間猶作洛生吟。

弄雲亭

自知無業致吾君。只向空山弄白雲。已共此山私斷定。不須轉轍重移文。

函谷關

寂寞函關鎖未開。田文車馬出秦來。朱門不養三千客。誰謂雞鳴得放回。

文恭集卷七

奏議

論郊丘定配

臣竊以國家乘火而王。火于五行。其神屬禮。漢書天文志曰。火禮。以此而言。國家常須參考典禮。以順火性。伏觀京師。自秋不雨。綿歷三時。聖心焦勞。臣下隕越。思所以消救之道。未知所出。伏惟陛下明德恤祀。虔恭郊廟。宜蒙福應。乃遘災旱。古者祭天神無二主。禮專一。所以奉天帝之尊。明不敢瀆。三代兩漢之盛。莫之敢易。唐初始有兼配之事。垂拱中。禮官希旨。郊丘諸祠。遂有三祖同配之禮。開元十一年。明皇親饗。園丘。禮官建議。遂罷三祖同配之事。除此之外。未有一代三帝同配昊天之神。禮。國家至道三年。詔書親郊。園丘。以太祖太宗竝配。陛下卽位。景祐二年。詔禮部詳案典禮。辨崇配之序。詔書節文。自今以往。太祖定配二宗。迭侑。去年八月八日。詔書。今次南郊。三聖竝侑。後次卻依舊禮。布告中外。咸體丕懷。未踰旬日。復有今後每遇南郊。三聖竝侑之詔。竊尋詔旨。先後不同。此誠陛下至孝烝烝。虞舜之用心也。然有違典禮。未合天衷。致旱之由。恐在于此。臣愚。欲望聖慈。今後南郊。乞且依去年八月八日詔書。及景祐二年禮官

所定太祖定配之典。追寢去年八月二十四日。今後每次南郊三聖竝侑之詔。告謝天地。以順火性。必蒙福祉之降。足消災旱之異。臣若心知不可。口不敢言。卽是長負陛下獎育之恩。沒有餘責。

論詳定官制

臣等昨奉敕爲翰林學士韓絳上言。國家奄有四海。承平百年。官制未修。方苦其陋。欲望討論唐百官制。及本朝官制品秩事件。量加裁定。正其名體等事。奉聖旨。着臣等同共詳定。臣等累曾懇辭。不蒙允許。尋具劄子陳乞。且未置局。容臣等取前代官制。將今日各官職位。商度可改正者。可裁損者。可申明者。各條三兩事。先送中書門下。更加商量。若果有施行。卽置局辟官。次第刪定。奉聖旨依奏。臣等今詳定到事件如左。

一漢置丞相。其後改置三公官。皆公府辟召掾屬。唐制以尙書門下中書三省長官爲宰相。尙書令僕射侍中。中書令是也。官品未至者。同中書門下三品。今平章事卽其比也。參知政事。唐初亦是正相。崔溫等嘗爲之。國朝之制。下宰相一等。若用唐制。正其名體。則四輔之任。當悉用平章。依漢制。卽須立丞相府。一唐制。御史大夫一人。中丞二人。國朝之制。大夫不置。以中丞爲臺長。他官或以給事中。諫議大夫。權之。若欲改正官制。置丞相府。則大夫當復輕重乃等。

一唐制。無公卿爲樞密使。五代用兵。始與中書對掌機密。欲改正官制。當以院事還中書。及尙書兵部。一尙書省二十四司。旣爲虛名。所以官冗員衆。若欲正官制。當罷三司二十四司。及九卿官。使有定員。其

郎官不在本省治職事者。竝以前資及散官處之。其在外任者。或依唐制置上中下等州刺史及別駕之類。陪官品任之。或欲輕其權。則曰知某州刺史之類。

一文武散官。及檢校兼官勳爵實封等。在開元以前。頗有實事。于今雖散。猶敍服色。粗繫輕重。其餘悉皆虛名。無益治體。欲改正官制。當例行省罷。若以假虛名而任實職。兼存亦可。

以上所謂改正者也。略舉一隅。若于今可行。即推此類具正之。

一大理寺決天下之獄。刑部覆之。于事已足。又加審刑院。則爲駢衍。欲裁損官制。當以院事官屬還刑部。一吏部尙書侍郎分領銓事。則當差以輕重。分別流品。今審官院掌京朝官磨勘差遣。而流內銓次。惟典州縣幕職官。體制不倫。欲裁損官制。當以審官院職事歸尙書銓。州縣幕職官歸侍郎銓。一羣牧司提舉司糾察司之類。皆古無此職。欲裁損官制。悉當省罷。還屬尙書九卿。

以上所謂裁損者也。略舉一隅。若于今可行。即推此類具正之。

一左右史竝當隨宰相入立仗下。以記言勳。今史官之任。不及聞前殿政事。故德音善政。多失紀錄。欲申明復此舊制。

一中書出制敕。唐制竝經門下審覆。然後尙書出告身。經歷三省。比來惟中書發敕。虛置三省官名。今欲申明復此制。國朝令文具載。

一國朝近制。觀文殿大學士。惟待舊相。自資政殿大學士至天章閣待制以上。其間多有無員數。除授寔

廣者。繇邊幅不立也。諸舊有員者。宜依舊數。未有者。宜差定其員。著爲久制。以革溢員之濫。

一。唐制舍人六人。分判尙書六曹事。所以佐丞相。謹政令。欲乞申明此制。

一。舊制九卿之職。不隸尙書令。卿監職事三司。關領者。宜取還寺監。亦省侵官之類。

一。唐制左右丞相。判尙書省事。中書判門下省事。中書舍人判中書省事。國朝門下省權用近臣判之。中書省卽舍人年深者判。與唐制略同。准昨來言者稱。近臣判省權太重。考按唐制。似不如此。惟常袞自以同中書門下事。卽當兼判中書省。是時崔祐甫以舍人判省。謂袞侵官。士論由此不平。袞也。

一。三班自供奉官至殿侍。差使之類。唐制武選皆無此名目。宜徙置于外。以區別華冗。

一。朝廷若欲從改正之說。卽俟改正之後。設官分職。如周唐。乃可約六典著書。垂之後世。若未能如此。而欲著書。惟可將會要及諸司編敕并格令。刪繁取要。今日官名。粗書職分而已。

以上所謂申明者也。略舉一隅。若于今可行。卽推此類具正之。

論罷上元放燈

臣或聞臣僚上言。以今春開淘汴河。興役至衆。乞罷上元放燈。以防一切。放燈誠非急務。于公私無益。然罷之亦須有名。若以開河爲言。恐于體不大。今東南數路。災旱甚廣。穀價翔踊。民食飢乏。又河北水沴。愁蟄未息。若惻然降旨。藉此而罷。則于名義甚大。四方觀聽。必喜聖心有矜憐窮困之意。或因晝日晴和。車駕臨幸。寺觀燒香。以祈民福。足以慰都城士女之望。伏候進止。

論人使詣塔燒香

臣等今月十五日同契丹人使并三節人從詣相國寺普滿塔下燒香竊見本塔屋宇損動四隅用枋木薦撐環遶其下吁可爲懼退思延戎使燒香之意本欲以浮圖之勝誇示遠人若不繕完恐非壯觀如惜軍國之物重爲之費卽乞將泗州塔下等處寺院施利錢物早與修完及其未傾隕易爲施力若其摧圯所費益大取進止

論臣僚進對密陳機事卽時外傳乞賜防閑

臣聞爲君難爲臣不易易大傳曰君不密則失臣臣不密則失身春秋譏漏言以爲至戒君上不可不察也伏惟陛下躬大聖之姿體至仁之量推誠接物降心求治每臣下進見莫不震威嚴和顏色問民俗之利病詢朝廷之得失此虞舜好察邇言之意也然其間樞機所發禍機或隨臣下不可不慎也比來羣臣進對有所密陳往往卽時傳之在外豈非防閑之道未盡其要今後臣僚上殿欲乞嚴屏左右以防漏泄若此則忠言益進聖聰彌廣無機事不密之害伸近臣盡規之忠謹具奏聞謹奏

論楊懷敏不當除內侍都知

敕入內內侍昭宣使眉州防禦使楊懷敏除入內侍副都知臣當草詞者臣聞昔懷敏先任入內內侍省副都知管皇城司公事宿衛不謹致逆徒竊變震驚宮闈嚮非宗廟社稷之靈陛下乘輿幾殆及逆徒既獲又不坐死致規滅姦人之口天下之議罪在懷敏楊景宗二人而已臣每念此事痛心扼腕陛下仁聖

不忍加重誅。止解內職。令居外任。今因奏事。忽有此命。若再復內侍名職。且赴本任。是不久將復入內侍省之職也。若再居內省。則宿衛之變。復未可知。兼條制內臣。都知副都知之職。有過降充外任。更不許再居舊職。所以防一切之微。深遠之法制也。伏望陛下。令有司檢詳舊制。追寢今命。法制一壞。復之良難。有此違礙。臣不敢草制。其中書送到詞頭一道。臣輒封還。伏候進止。翊日上謂宰相曰。前代豈有此故事。不草盧杞制書。近年富弼。亦曾封還詞頭。上意解。改命舍人草制。臺諫論列。皇祐元年十一月二十九日。以昭宣使眉州防禦使懷敏。充三陵副使。

乞楊安國改官

臣竊聞侍講學士楊安國。近有奏劄理會磨勘轉官事。或聞安國改官。已得四年有餘。中書爲安國會因舉官罰銅。隔住一年。至明年三月。方該轉官。安國授經老臣。年近八十。桑榆暮景。光陰幾何。況久侍講筵。與其餘侍講不同。緣此月十八日。講畢周禮。宜因此時。欲乞陛下。面賜安國改轉。宣中書施行。以爲老臣授經之榮。兼彰陛下重道之美。書于記注。實光聖德。芻蕘之獻。惟賜採擇。取進止。

論差三館都監不合辟

臣伏以三館圖書之府。朝廷育材之地。用內臣爲都監。典領事務。自來差除。或許判官及館職自舉其人。貴得謹良。以接英俊。近差下三陵都監任從禮。充其任。近已身亡。朝廷尙未除人。竊緣判館之職。罕與內臣相接。縱有所舉。亦未周知其履行。今後三館都監有缺。伏乞朝廷精擇其人。以充取進止。

繳進李康侯廣律判辭

據前權知滄州軍州事判官李康侯狀。昨在任日。著成廣律判辭十一卷。通四冊。念康侯數年用心。尋究律意。根援典禮。伏狀繳奏。進呈者。右具如前。臣等竊以吏道之本。法令爲師。凡厥士人。旣霑利祿。雖勤几案之決。罕精律例之微。前判官李康侯。早登詞科。深好法學。因傳經義。條爲事辭。著成廣律判辭十一卷。以廣律意。志勤可采。學尙足嘉。幸值盛辰。弗遺小善。臣等謬承朝委。典司銓集。復叨近侍。敢壅上聞。其李康侯撰成廣律判辭十一卷。共四冊。謹具狀繳進。或稍有觀采。伏望聖慈。候刑部大理寺詳覆。斷官有缺日。特許先次除注。勸會本人。歷任竝無過犯。在朝亦無親的骨肉食祿。見在銓參選。謹具狀奏聞。伏候敕旨。

論殿試攷校

臣竊見舊制。攷校御試舉人卷子。不過五六日。催促了畢。即便放榜。誠是太速。恐有未精。近制御試許限半月日攷校。蓋欲詳加掄覈。務在精當。然而采之衆論。亦有未便。或聞初攷與覆攷二處。各限五日。攷校須候日滿。攷盡卷子。定了等第。方得次第關發。如此。卽覆攷與詳定所。端開多日。卻成留滯。況近來間歲科場人數。卷子止千二百。欲乞將來御試。且依舊存半月日限攷校。外降聖旨。令初攷覆攷所。更不限定日數。但攷絕卷子。定了等第。即便關送與彌封所。令彌封所發往覆攷等處。若于限內攷校了畢。乞便放榜。不須候滿半月。兼免日久有所漏泄。及免禁中久留。燈火不便。取進止。

論換巡尉

臣竊觀今夏四方州郡山水發溢。至入城郭。漂廬舍。壞棧道等。在五行。水曰潤下。爲害若此。是失性逆理之象。在易。坎爲水。爲盜。宜敕四方州郡長吏。及逐路轉運使。提刑等。常切謹視盜賊。應採取金銀銅鐵及鼓鑄錢幣聚集羣衆之處。宜密設方略。常爲警備。部內巡檢縣尉。捉賊使臣。如有情病昏昧。及弛慢不堪居職者。宜令具姓名體量聞奏。下三品流內銓選。差有材武勤幹之人充替。或部下監當使臣有材幹之人。具被體量者。內有未至全然昏昧。可以監當場務。許令權且對換勾當。是縣尉未至全然昏昧者。亦許于判司主簿內選擇對換勾當。一面奏聞。乞從朝廷指揮正差。若巡邏得人。則能教習武藝。整齊部衆。遏防之道。伏候進止。

論弓手替換

臣謬奉朝寄。預司民政。今有管見。輒敢敷言。臣竊尋國朝舊制。天下縣邑所置弓手。本防賊盜。選人才會弓弩者充。初無年限許替之文。蓋欲其役年深習慣。武藝又周。知山川道路險易。姦寇窟穴之所。若有盜發。易爲擒獲。編敕節文。弓手惟老弱貧乏乞替。本縣保明。申本屬長吏。體量差替。亦慮縣邑受倖。至天聖明道中。江淮饑饉。妄有替換。故立此制。以防其弊。然朝廷遣使安撫。右司諫范中淹奏。乞今後弓手及七周年者。許替歸農。七年滿。情願執役。身手強壯。能捉賊盜者。州縣體量。依舊執役。尋范中淹所奏。蓋因災傷權宜。建白。以竟一時之勞。係令有司銓揀其弓手強壯者。不得一例差替。自後諸處縣邑。爲有上項指揮。有司乘此受倖。不問貧富老少勇怯。纔及七年。本縣便一例差替。多是不申州長吏體量。其間未及七

年者甚多。非徒新募弓手生疎。不堪捕盜。一爲弓手。則不能力農。非勸農敦本之意。反爲良善之患。欲望聖慈尊祖宗成憲。勿輕改易。庶幾倖門塞而天下安。取進止。

論北界點集事宜

臣聞近日契丹于燕代之間。點集兵馬。聲言西討夏國。恐非其實謀。兼前來國書商議未合。近日橫使不至。虜情難測。忽此點集。有可疑慮。兼廣南蠻賊狂盛。陷沒州郡。朝廷方誅討用兵之際。契丹不宜有謀。若二寇並興。四方可慮。國家貴權以濟事。欲解紛難。不可循常理也。若旬日間。契丹不遣使來。臣欲乞聖度詳度事體。選差能專對近臣。往使北戎。與議定國書。固其鄰好。雖事之成與不成。未可決定。亦可以探得虜中動靜。若果蓄異志。必有違言。便須大爲之防。以備邊境。伏候進止。

論詰責言官言事涉後宮之親

臣聞聖主悅至言。好崇諫。所以廣治道。防一切之未然也。臣以螻蟻竊觀陛下特稟上睿之德。能聽大度之言。數賞諫臣。比耀臺職。推誠含垢。美盡君人之量。堯舜之用心也。近日聞臺官言事。爭涉後宮之親。出于風聞。有旨詰責。臣愚以謂諫官御史。朝廷紀綱所寄。雖有過謬。可且優容。昔漢文賢主也。袁盎直臣也。帝所幸慎夫人。盎掌諫。爭言涉不遜。初雖怒。終不加罪。後慎夫人聞之。復賜盎金五百斤。慎夫人所以能保榮寵者。以能賞袁盎之直言也。漢元帝時。馮野王。昭儀之兄也。德行高妙。推爲第一。時御史大夫缺。公卿多薦野王爲之。帝曰。吾若用野王爲之。天下必以我私後宮之親。昔德宗謂李絳。比諫官論奏不實。欲

出其尤絳曰。此非陛下意。必儉人以此營誤上心。自古納諫昌。拒諫亡。君尊如天。臣卑如地。于不測之禍。雖開納獎勵。尙恐不至。直士杜口。非社稷福。臣願陛下鑒觀前史。開納至言。臣不勝區區之情。

論兗國公主議行冊禮

今月二十一日。草福康公主特進兗國公主制。竊聞議行冊禮。然于事體頗有未便。祖宗以來。公主長主。未有行此禮者。昔漢明帝封皇子。悉半諸國。明德馬皇后曰。諸子食數縣。不已儉乎。帝曰。我子豈敢與先帝子等也。唐貞觀中。太宗長樂公主將出降。帝令有司資送倍于永樂公主。魏徵曰。不可。引漢明帝之言爲對。且曰。天子姊妹稱長公主。加長字。示有所尊崇。或可情有淺深。無容禮相踰越。太宗然其言。入告長孫皇后。后遣使賜徵金帛。陛下卽位以來。累曾進封魏國。楚國。二大長主。亦不曾行冊禮。今施于兗國公主。是與大長公主相踰越。兼以貴主之故。賢妃亦蒙殊典。有旨令進諭告。不行冊禮。是母子之間。一行一不行。禮意尤不相稱。書于史冊。後世將有譏議。必謂陛下偏于近情。虧聖德之美。臣願陛下采漢明之言。開文皇之聰。遵祖宗舊典。如國朝公主曾行此禮行之。粗且無嫌。如其不曾。則宜且罷。臣以陛下好忠諫。納至言。臣職在論思。不敢不言。

論太湖登在祀典

臣竊見吳中太湖。卽禹貢震澤也。廣三萬六千頃。其水利溉蘇湖常三州之地。而蘇湖爲多。去二郡亦近。湖中大小山七十有二。洞庭林屋。福地皆在其中。商帆賈楫。日相上下。二郡各有湖廟。而常州無廟。蘇州

廟在洞庭。湖州廟在大錢口。方俗目爲平水大王廟。是也。二郡小小叢祀皆祭。而太湖獨不祭。蓋由祀典失載。因循忽諸禮。境內山川諸侯當祭。國家儀文咸秩。靡祀不崇。其太湖欲乞下湖蘇常三州。登在祀典。春秋差官致祭。取進止。

論伐鼓于社當在正陽之月

昨觀六月之朔。日有蝕之。禮官奏行伐鼓于社之禮。某受詔告祭太社。是日雲氣擁護。太陽纔食數分。隱而不見。至晚復有雷雨之應。然自此數月。陰雲相繼。淫雨未息。攷之書傳。竊有感焉。謹按尙書。季秋辰弗集于房。瞽奏鼓。此則夏禮伐鼓之始也。又按春秋左氏傳。唯正月之朔。慝未作。杜氏注正月。夏之四月。謂正陽之月。日有食之。天子伐鼓于社。責羣陰也。諸侯伐鼓于朝。據傳而言。它月則否。穀梁救日之法。陳五兵五鼓。亦在莊二十五年六月辛未朔。亦正陽之月也。書傳交戾。典禮不同。太社主陰之神。有國尊奉。非當鼓之月而行。攻責書傳二說。禮在可疑之間。淫雨之來。或恐緣此。竊見太陽禮院告報。准中書劄子。奉聖旨。分遣臣僚詣宮觀寺院燒香祈晴。謹按祠令節文。霖雨不止。祈社宜。因此祭兼祈太社。太稷以息淫雨之沴。祠令所載。於禮無嫌。謹具狀申中書門下。

同劉敞孫抃論四后配食

臣等謹按春秋傳曰。大禘者何。祭也。未毀廟之主皆升合食於太祖。是以國朝事宗廟。且百有餘年。至禘之日。別廟後主皆升合食。遵用以爲典制。非無據也。此皆更聖祖神宗盡心極慮。制節垂法。以貽子孫者。

也。未易輕改。且宋家宗廟之禮。參用歷代。因時施宜。不專取於周唐。何以言之。如太宗真宗二帝。並配三后。孝章嘗母饑天下。而享於別宮。淑德以元妃正嫡。亦享於別宮。原其憲章沿革之始。似出聖意。自有所在。若規以一家之學。則紛然皆亂於上矣。且行之已久。視祖宗史。既守以爲常。若一旦輕議損益。恐神靈不安。亦未必當先帝意也。議者乃謂四后之主。於合食則貴有所屈。於別享則尊得以伸。然則且不疑於黜遠四后。而獨豐於昵乎。他年有司攝事。四后皆預合食也。今陛下方欲躬齋戒。奉祖禰。而四后見黜。不亦疑於以此禮之煩。而不能事其先妣乎。受命之君。以創禮革典爲急。繼體之君。以承志遵法爲美。先帝創之。革之。陛下承之。遵之。臣曰可矣。宗廟之祭。至尊至重。苟未能盡祖宗之意。則莫若守其舊禮。疑文偏說。未可盡據。傳曰。祭從先祖。又曰。有其舉之。莫敢廢也。此之謂也。臣愚以謂如其故。便。

文恭集卷八

奏議

論征蠻

臣竊見前代征討蠻寇。所以爲難者。以其保聚巢穴。掠害邊境。興師深入。則有山林之阻。久屯則有瘴霧之毒。兵不得戰。人多疫死。此其所以爲難也。今者邕士蠻賊。盡率反黨。遠棄窟穴。頓于廣州堅城之下。平地之上。已六十餘日矣。退則歸路至遠。進則大軍已集。以臣料之。賊氣必沮。或聞廣州雖有山林。不至深險。賊久留不進者。此天亡之機也。今涼風方至。瘴氣已息。賊處平壤。官據堅城。士卒相依。弓弩得用。天時肅殺。宜行誅討。江西等路。雖苦水旱。計其小熟。及茲西成。猶足以調撥贍軍。助國討賊。臣以此觀天時地利人事之形。王師誅逆。宜及秋冬。不可逗留。更無機會。楊畋謙默不伐。深沈有算。兼其忠孝出于天性。誠堪屬以南伐。總茲師律。陛下宜申勅諸將。稟其節制。則軍衆有所統一。號令得以施行。今因賊亡之機。與天時之利。參定滅賊之策。勿貪一時之功。戒之以在和。訓之以持重。多方設巧。燒其船艦。使賊不得下海。賊若下海。攻陷瓊管。以爲窟穴。卽介在海外。王師無由致討矣。乘間竊發。入寇腹心。則嶺南諸州被害無

有已時。更復遷延至春夏。或誘合鹽賊。或煽動羣蠻。則江西諸路。疲轉漕之役。失耕稼之業。大軍有疫死之懼。懷思歸之心。久則變生。一切雖在發生之候。必用誅伐之威。夫逆天時。虧地利。失人和。三者舉事之忌也。臣愚狂妄。輒謂方今之計。宜先料賊之多少。計兵之衆寡。若賊有萬人。王師須有三倍之勢。料擇精卒。習用長技。品配其衆。番休與戰。彼寡我衆。彼勞我逸。利則督士苦戰。不利則斂兵且止。如此者三時。待其衰困。各懷去就。乃可申購募之典。赦脅從之罪。則人思效順。衆必離散。然後合勢大舉。以圖殄滅。若失機會。恐逆黨愈盛。而後患滋大。昔者食養之人。猶憂疆場。負薪之語。或益廊廟。狂夫之言。聖人擇焉。謹具奏聞。伏候敕旨。

乞留三御史劄子

臣竊以御史者。天子耳目之官。所以上廣聰明。下防威福。若有畏懦無狀。緘默不言。卽是尸祿素餐。負陛下之任使。罪之可也。若其不畏強禦。糾發姦遠。可謂能言。是其本職。旌之可也。近聞臺官彈奏。事連宰相。陛下不置詔獄。按問。止令開封府訊狀。憑劉宗盟一面單辭。黜三人御史。于朝政有損。于人情未服。昨日聞御史差敕留中。未下外議。皆謂。必是聖心覺悟。不黜臺官。人情莫不喜悅。剛猛御史。自古難得。今若遂去。須別舉人所舉之人。未必能勝此也。近日講見未息。姦宄須防。古人有言。猛虎在深山。藜藿爲之不採。猶言直臣在朝。姦臣遠避也。臣欲乞降旨。留三御史在朝。以警姦邪。臣作晚蒙宣召。已曾面論此事。欲乞聖慈。更賜詳度。

乞慎選省府推判官提點刑獄

臣聞漢制刺史奉詔條察州秩六百石至卑也。委之察一部者。意在秩卑無所顧惜。敢刺舉耳。某年初置刺史部。十三州文武名臣。欲盡委察。今之轉運使。大抵漢刺史之職也。陟黜臧否。興利除害。莫不係之。國初用官亦輕。選才則重。其間外計多著能名。古人有言。引一代之人。理一代之務。不借才于異代。若謂方今乏人。是誣一代之人也。願朝廷所選用何如耳。若欲天下轉運使盡得其人。莫若慎選省府推判官。提點刑獄。此三道者。取才之要。比來夤緣用人。忽略此職。一概置親厚之吏。或假借橫勢之家。故外計之任。有以資敍而入。往年葉清臣在三司。判官不才者奏罷數人。當時物論是之。今稍稍復用矣。天聖景祐之間。屢降大敕。舉提點刑獄。頗亦得人。近年多沿差遣。敕上帶入。選舉之法。格而不行。又罕見顯拔循吏。爲之省府。陛下惠綏元元。勵精政治。近制川廣知州。通判知縣。並須選差。所以重遐方而矜遠俗也。況轉運使。提點刑獄。表率部吏。宣明風化。可不慎擇哉。宜得通民事綽有才望者居之。若按舉稱職。風績較然。或增秩再留。或移莅劇郡。俾久其任。以伸厥能。諸積久累官。秩高而才下。素望不著者。不可使居其任。恐墮職事。且非陛下求治之意。

論除授宿衛帥臣

臣竊以殿前馬步軍等帥臣。統陛下爪牙之兵。爲陛下心腹之佐。宿衛宮省。拱翼宸極。凡所進任。固先出于聖意。然後參訪大臣。公議既同。方可除授。近來內外臣僚。多舉武臣管軍。此非臣下輕可論薦。漢宣帝

時丞相黃霸薦侍中樂陵侯史高爲太尉。帝使尙書召霸曰：樂陵侯高帷幄近臣，朕之所自親，君何越職而舉之？尙書令丞相霸免冠謝罪，數日乃決。霸爲丞相，薦高爲太尉，以職事言之，未爲過舉。猶見詰責如此，豈非以太尉掌武之官耶？陸賈有言：將相相和，則權不分；權不分，則士豫附。士豫附，則國家安。以此而言，宿衛帥臣當選謹厚樸忠之人，以總禁旅，不宜輕用論薦，以收私恩，或任非其才，則開隙生事，國之利器所宜慎重。

論河北邊備事宜

臣聞地有常險，而國無常地。此古今得失之勢異也。古者北有盧龍之塞，白檀之險，隔限南北，中國得之，控扼北狄。今此二險虜反有之，河北地形無險可守。自河南北達于澶淵，平壤二千里，景德中一旦虜騎至河上，當是時去祖宗纔四十年，兵強將勇，習知戰鬪，至煩章聖親駕虜始懼而乞和。河北名將帥楊廷昭、馬知節、李允則、何成矩、孫全、有盛名，扈駕則李繼隆、石保吉，內臣則秦翰，皆數經戰陣。自河決商胡失橫隴故道，中國亡大河之險，虜乘虛擣滄景，則山東危。願用張宗益、郭申錫言，割濱缺，德博以隸滄，別爲一路，屯兵以扼虜衝，備不虞，國之福也。伏望聖慈，特詔大臣講究速行。

論邊界守約束

臣聞憂患之來，多藏于細微，而生于人之所忽。自邊臣趙滋舉行界河，打魚刈葦，一切禁斷，由此漢兵多與北鬪，累年不絕和好之體。一旦至此，怨隙之開，亦不在大。去年八月庚寅大雨水，今春彗孛譎見，上天

不言以文象示下。陛下宜思內外憂患。彌縫其缺。蓋有備則患不能深。無覺則亂不能起。界河武思趙用。輩雖時立小忠。皆不達大計。宜密行戒約。臣觀景德詔安撫司。皆防微慎重。自景德以後。詔書數更。北人打魚安于積習。邊吏弛職不復譏呵。及至舉行舊條。而淵魚見察。衆狙皆怒。履霜已深。堅冰且至。願大臣早爲之備。國家承平百年。與敵通好者六十歲。內外無患。前所未有。近年邊遽來上。不過侵誣尺寸疆候。此夷狄之常態。縣案之本職。移文足以辦之。何遽至興甲兵哉。今搢紳中有恥燕薊外屬者。若天時未與。人事未至。而欲妄意難成之福。不如講和息民。擇良將以守邊。選能臣而修聘。外固歡和之形。內修守禦之備。羈縻不絕。守眞宗仁宗法度。以惠養元元。則天下幸甚。

論西夏事宜

臣聞漢武收河南地方。朔方開置河西五郡。中國得之以隔絕羌胡。不得相通。前世謂之斷匈奴右臂。今盡爲夏國所有。夏國主諒祚。恃犬羊之衆。濟凶父之惡。去年不顧誓詔。燒劫秦鳳。涇原兩路熟戶。肆行殺掠。滿意而去。邊臣畏懦。按兵不出。朝廷降詔詰問。拒使者不之納。及賀正人至。以壕外地屬戶爲說。此地慶歷中西蕃溪洞所獻。檢據甚直。詔答已詳。近日延州按撫司復奏夏國乞遣使齎狀乘驛詣闕。其意無他。止是申尋前語。圖起爭端。臣恐疆場之憂未息也。如聞西人常有意謁秦中同家堡一帶蕃部。正扼西賊來路。涇原若失此險。無所隔閼。賊馬一二日可至古渭。可至古渭。則秦中搖矣。雖聞今年歲在東井。爲關中之福。星家說鎮歲所在不可加兵。然五緯盈縮進退不常。難可恃也。彼若不畏天道。輒來犯順。盈縮

繫于天道。成敗先于人謀。若止是論議。理壕外地界。朝廷必無開許。彼見不許。有必爭之舉。大集羣醜。以撓諸務。如聞西賊尙有窺伺邊隙。結納熟戶之意。欲望聖慈。明戒邊帥。豫備不虞。綏靖鎮撫。明遣間探。講練軍政。以佚待勞。彼知我有備。決不敢遽起事端。

論邊事

臣竊以景德二年。遼人乞和。章聖深維遠慮。務息邊氓。俯屈至尊。下柔獷俗。繼以仁宗聖德。順成先志。彌縫間隙。得羈縻勿絕之義。自爾邊境。長無風塵之警。父老不識金革之事。大德至恩。在民深矣。國家承平百年。其間通好。居六十年。前世所未有。近日戎人移建鋪居。侵越代州疆界。吏止之。奮兵與漢兵鬪。又雄州奏契丹人騎兩過拒馬橋南。伐去柳栽千餘。放箭射歸信縣尉。又界河舊制。北人不得取魚。雖素有禁防。或聞私亦曾採捕。舊不聞有鬪爭之事。近年禁禦太密。鬪爭不絕。亦曾射傷巡檢。殺死邏兵。邊臣恬然。曾不爲怪。朝廷奏報。視爲閒事。未審鬪爭不止。其末如何。皆積不相能。馴致此釁。履霜之漸。堅冰且至。誠懼章聖和戎之策。從此而壞。國家居常備陝西。次及河東。未嘗深留意于河朔。陝西河東兩路兵官。經朝廷選。所得差多。極邊城寨都監寨主之類。則又許帥保薦。頗得土人。曉諭山川險易。習知蕃戎情態。又有內屬蕃部。爲之障蔽。土兵蕃落。保捷之屬。皆便弓善戰。以一路兵力。得良帥制之。寇至。可以戰。可以守。河東險固。去年西賊燒劫涇原秦鳳熟戶蕃部。迄今環慶賊馬鈔掠未已。然今年歲在東井。東井秦分。爲關中之福。星家之說。鎮歲所在。不可加兵。宜勅沿邊諸將。嚴兵爲待。賊若大舉犯順。我得天道。不宜縱敵。兵

法所謂敵加于己不得已而應之者謂之應兵。兵應者勝。彼自守窟穴無所侵軼。不宜提兵深入。自違天道。前所謂朝廷未嘗深留意于河朔者。豈非特盟好重改作防虜人之疑乎。方今之計莫若外固懷和之形。內修守禦之備。且河朔地形無險可守。自雄莫以南。平壤千里。往時黃河流入虜境。無慮五七里。自河決商胡。不由橫隴故道。河北水流散漫。失中國大河之險。不能限隔戎虜。盛冬冰合。胡騎可過。虜人若以精騎擣滄景之虛。長驅南下。則京東搖矣。河北雖有塘水城壁。利兵堅甲。無所用之。臣非能知前後通達事者言之多矣。朝廷以北虜無釁。未暇經略。今來邊釁已有萌芽。防于幾先。姦謀自破。今陛下聖德日躋。神機天挺。燭知萬事之統。坐照四夷之情。廟堂之上。俊乂大臣。皆有文武全略。通知三路利害者。豈臣愚瞽。擧聞所能究知。然而負薪之語。有益廊廟。況預聞政事。稔知邊患。敢默而去乎。欲乞令中書樞密院檢取前後臣僚上言章奏。相度可否施行。

辭免尙書禮部侍郎劄子

臣近蒙聖恩。不次遷秩。傳聞之始。隕越于下。尋具劄子。懇叩乞行追寢。而高邈之聽。未照卑凡。樸訥之辭。不蒙開允。今早亦嘗面奏。親奉德音。仍遣中人奉宣宸旨。促令祇受。押赴告謝。以聖慈堅重。天語丁寧。不敢有違。尋已授訖。然而公議可畏。私懷未安。須至縷陳。重煩聽覽。伏惟仁宗皇帝。以仁聖至德。臨蒞天下。四十載。東宮虛位。大本未立。知陛下有聖賢之量。建爲皇子。付託大器。天人之望。宅心有所。四海之命。始有攸屬。一旦入繼聖統。中外晏如。厥初大憂感慕。聖體雖小有虧和。而神靈護持。終獲勿藥之喜。是祖宗

基德之厚。仁宗知聖之深。在于羣臣。何力之有。豈敢貪天之功。橫受寵命。自省甚熟。衆議謂何。況臣衰殘。無所云補。未能引退。已負兢慚。儻竊崇恩。更尸厚祿。必招譏議。恐致咎殃。伏望睿慈深亮。懇惓。追停渥命。庶安危抱取進止。

狀

舉臺官狀

准敕。限十日內。于外任太常博士以上。曾歷一任通判成資以上。或歷通判一年以上。堪充三院御史。保舉兩人。聞奏。如三丞內有合該磨勘者。亦許保舉。仍須自來別無賊濫。忠厚淳直。通世務。明治體之人。如朝廷遷擢任用之後。所舉人犯入己賊。竝當同罪。其餘賊私。及不如舉狀。亦當連坐者。一員某處任官。貼于任所一員某處任官。同右謹具如前。臣伏見上件官等。竝是直諒多聞。堅正有守。資于風職。濟以文采。堪充三院御史。臣今保舉。如朝廷遷擢任用之後。犯入己賊。并其餘賊私。及不如舉狀。竝依所授敕命指揮。甘當同罪。連坐。謹具狀奏聞。伏候敕旨。

乞楊開充大理少卿狀

臣等伏見國子博士楊開。材資敏通。檢履端約。深達時務。尤長法律。先曾刪修銓司敕條。至今行用。稱爲允當。昨日知絳州。服除。赴闕審官。三班院見各奏辟刪修。本司條貫。觀其議法詳平。正而有守。臣等今保

舉堪充權大理少卿公事。如經朝廷擢用後，犯正入己賊，及不如舉狀，竝甘同罪取進止。

兼侍讀學士舉官自代狀

臣伏蒙聖慈，除臣兼侍讀，準敕合舉官自代者。竊見尚書戶部郎中、直史館、張瓌，博通古今，練達典故，有國僑博物，胥臣多聞，可以進讀羣書，入奉大對，臺閣久次，朝廷具知。若以代臣，允協公議。

論增經術取士額狀

臣等竊以六經傳先王之道，教化根本。舊制試進士，止以詩賦策論，簡拔才俊。其實少有專門名學之人，諸科雖能誦記章句，復又不通大義，施于有政，則又面牆。所以前後論取士者，常以此科爲言。景祐制書節文，始令禮部貢院舉人通三經以上，進士諸科過落外，許自陳嘗于某處講授某經，貢院別試經義十道，直取聖賢意義，解釋對答，或以詩書引證，不須全具注疏，以六通爲合格。講誦精通，具名聞奏，乞差學官，或御試覆試，得中，具對義粗通，取旨。此則聖朝扶進經術，漸復兩漢射策之舉也。慶歷六年，應詔者四十人，合格者八人，進士諸科各四人。皇祐元年，應詔者八十二人，合格者七人，進士五人，諸科二人。今年投牒進士七十七人，諸科五十人，凡一百二十七人，比之嚮來，數目倍多。豈非詔書開勸使然，而利祿誘導之至也？條制每科不得過五人，比再經覆試，又須通落，獎進之路，似未開廣。恐學者稍怠懈，美業中止。臣等欲望聖慈，稍增人數，以勸來者。四方聞朝廷參用此科取士，莫不靡然向風，潛心經術，則彬彬之舉，兼成于前代矣。臣等見精加攷試，須至具狀奏聞，伏候敕旨。

代中書密院傳法院罷堂奏狀

臣等伏蒙聖慈以傳法院譯乾元節新經罷堂就本院特賜臣等御筵者千載挺生屬感符而毓聖五天駕稅慶繙貝以成書仰契真乘永延壽歷方繕寶函之目將升綈几之觀梵教旁流增演觀花之義宴慈申錫更均在藻之仁臣等叨預鼎司竝游譯館祝後天之洪祉參問佛之勝因彌愧空疎薦霑腆飫

奉使北朝先狀

備完使傳取道治封趨賓館以無階辱珍函而猥及瞻言勤意但切感懷

夙馳星馭已講于慶儀復次樂都遵承于染翰卽披光範深愜鄙懷

叨備使華已通邦好載馳軺傳俯屆藩垣遽辱緘賸但深銘鏤

將命宸庭修聘鄰壤征軺夙駕將次于會都賓館爲容卽瞻于台座豫爲歡忭曷罄言陳

參聯華隰修講鄰歡飾軺傳以載脂將臨于會府望門牆而延脰卽覘于台儀豫此欣愉實爲榮幸

信書將命恭修邦聘之儀行傳戒塗適次都城之壤辱榮函而俯及荷謙德以彌沖卽詣賓階豫歡私悃

議

代中書詔定大樂名議〔案〕宋史定大安樂名在皇祐三年禮臣王堯臣等上其議

准今年二月二十三日敕准今月二十一日詔敕中書門下朕聞至樂之大統和天人奮雷先聞萬物蠢

若聖人觀象于豫。以崇薦配。百代之興。咸有制作。眇觀載籍。旁採緯牒。詠功象德。率著號榮。若顯譽題根英之文。陶虞紀明紹之美。三王殊憲。稱謂炳焉。降及後世。鮮克遵尚。惟東漢命以大予。開元自云唐樂。雖距古未遠。而雅于言道。希風咸夏。朕所慕焉。故前詔執事。訪圖博採。將以立度出均。攷音正律。謹權審量。備器協舞。以定本朝之述作。用彰祖考之謨烈。夫名生于義。義出乎實。名正言順。然後事成。而禮樂興焉。庶幾光輝永昇來裔。其令兩制及禮官。參稽典制。議定國朝大樂名。中書門下審加詳閱。稱朕意焉。故茲詔示。想宜知悉。臣等謹議曰。臣等賤懵。不足以明國朝大樂。竊尋前志。探觀往古。受命而帝。聖功告成。守文之君。治道大備。濟斯民于富厚。流至化于洽平。鮮不攸合中聲。序正雅樂。效法功德。章明祖宗。宜之于鐘石管絃。著之于干戚羽籥。乃復揣稱治象。形容德美。度曲以颺其義。立名以統其實。崇薦郊廟。允諧神人。感召至和。以降嘉生。咸池而還。作者代有。韶夏大濩。從來尙矣。允屬熙盛。詎宜曠闕。伏惟太祖皇帝。謚武而聖。大度且仁。變伐拯于橫流。揖讓馭于歸運。平殄僭閥。掃除荒屯。天地號爲重開。區夏繫其再造。一戎底定。萬世以基。太宗皇帝。以聖域優入之姿。膺神器。傳歸之重。協承駿烈。紹敏武功。越人奉圖以歸忠。參墟銜璧而服罪。補正朔所隔。亦旣來同。文告是加。無思不服。廣英材之教育。盛王官之辯論。審克邦憲。祖尙人文。俗阜刑清。官修政舉。太平之盛。于斯經啓。眞宗皇帝。體全上睿。道合至眞。昭前之光明。而濟之以文采。化下以清淨。而納之于忠厚。謹任吏之法。嚴取士之規。爲官擇人。程才濟物。規安億姓。撫和諸戎。荒服遂要于衣裳。老人不識于金革。符命紹至。封禪勒成。咸秩上下之神。垂矜大小之獄。倉廩充實。囷囷空。

虛炳焉。聲明絕于稱謂。伏惟皇帝陛下。欽明燭治。仁厚好生。躬至德而若虛。求昌言而如渴。懷柔異俗。休息邊氓。繼好躋林。納附河外。簫勺羣慝。弓矢載囊。屏弋獵之娛。稀園游之幸。升世室之配侑。同戚藩之榮樂。刑書用其中典。民賦從于薄斂。積四聖之致治。逮百年之勝殘。山川鬼神。亦莫不寧。蜚魚磨卵。皆有常禁。海內蒙德。薰蒸太和。于斯時也。樂典未章。號榮不立。此有司之失。弗能究宣。陛下開至明。發深詔。敷求讎微之士。逮及承學之列。求端中忝造。始黃鍾攷律。和聲稽器。定制五音六舞。各得其準。習隸樂府。以覓三聖之功。德莫盛焉。臣等申被詔書。參定明義。謹按太常天地宗廟四時祠祀樂章。凡若干首。以安名曲。尋其義也。豈非本道德政教嘉靖之美。亦沿神靈祖考安樂之故。名既素定。義足欽承。詩美率由舊章。記稱孝莫善于繼志。書言惠莫大于安人。臣等議上國朝之樂。宜名曰大安。乞宣付中書門下。審加詳閱。謹議。

代中書密院覆議大樂名狀

功成而樂作。治定而禮興。百王之隆。道雖同貫。六代之盛。樂皆殊名。示沿革之匪常。明制作之遠出。移風俗而美教化。薦上帝而配祖考。以成功而告神明。非甚盛德。孰能預于此。往者。唐失根統。倒持罇柄。蕩無維御。遂至陵遲。日尋戈兵。時悼塗炭。九土分裂于下。三光錯繆于上。鬼神失其常祀。天地發于殺機。甲子一周。閏位五姓。天而既棄。唐德且厭。華亂。故駿命集于我宋。伏惟太祖皇帝。英武挺出。歷數攸歸。屬天道之與能。膺神宗之內禪。懲艾僭暴。顧嗟溺喪。奮耀靈斷。嬰行電討。芟除不軌。勤恤有生。經啓人倫。靖一天

字。兵賦悉還于公上。權綱不假于近習。除吏歸于尺一。立法約于三章。尊本京師。維制方夏。陶甄獨運。禮樂自出。全安諸國之後。崇立百神之祀。象緯宣精。人神享德。規模宏遠。基圖篤厚。開濟萬世。卓無與倫。太宗皇帝。天人宅衷。謳歌在聖。嗣膺神寶。續立武功。薄伐晉人。遂夷并壘。提封畢入。象譯具通。敦先儒雅之風。周咨政道之要。時文載郁。俊民用章。置讞刑之官。建藏書之策。講求世務。矜恤民隱。賦斂蠲其重法。更徭著于輕科。黎庶安生。刑罰幾措。真宗皇帝。續戎二后。神睿昭通。率由民彝。躬行儉約。勤勞機政之總。慎重刑賞之施。選舉廉能。賓興俊茂。右文崇術。勅農恤刑。德讓興行。吏治循厚。深恤民之愛。講和戎之利。戈革弗用。疆陲底寧。瑞命宜臻。頌聲翕作。始奉符而行事。乃昭姓而刻號。諸神受記。羣望咸秩。炳焉之美。同風三代。皇帝陛下。體慈上聖。迪惟前憲。臨下崇于含垢。在宥本乎好生。博愛無私。甚德而度。紹修戎好。銷戢武讎。事郊廟以肅祇。撫宗藩而敦睦。肅若舊典。祠于明堂。升侑尊先。泛澤勞下。積累聖之忠厚。滲生民之骨髓。物罔微而不遂。澤靡遐而弗臻。上下相安。表裏悅穆。思欲播祖宗之洪烈。揚雅頌之正聲。光施尊名。章示後嗣。同符韶舞。常爲稱首。故深詔執事。博延識微。乃者造計秒忽。攷聲立均。通鍾律之和。正干羽之綴。申命近列。制名大樂。俾援典禮。參加詳實。臣等欽惟藝祖之戡暴亂也。安天下之未安。其功大二宗之致太平也。安天下之既安。其德盛。陛下之承聖業也。安祖宗之已安。其仁厚。又享祀時至。神靈嘉樂。故郊廟樂章。大率以安名曲。臣等以謂國朝大樂。請如兩制及禮官所議。名之曰大安。

文恭集卷九

表

中書賀南郊祥瑞表

報本申虔。奉符展采。天心顧享。福應宜章。瞻列象之殊尤。浹羣心而聳抃。中伏惟皇帝陛下。德兼巍煥。運格清寧。敦慈寶以庇民。握道樞而裁化。念大事之在祀。逸典竝修。本至誠以感神。精心弗匱。比者因天心之紀至。就陽位而卜郊。惟洛櫃之祕文。乃霄晨之丕貺。戒嚴法衛。茂對鴻靈。爰自翼室齋居。清場宿設。躬致芬馨之薦。允迪純嘏之祥。十輝昭融。延和于北陸。五雲絢藻。垂蔭于宸中。旋整駕于殊庭。用致恭于眞祖。圓靈載廓。素魄徐升。聿昭三善之猷。迴發重輪之彩。諒皇穹之鑒佑。著睿威之敷聞。胥契享辰。茲爲至瑞。臣等幸陪禋祀。預覲嘉徵。慶躍之誠。倍異倫品。伏望宣付史館。以播英聲。

代中書樞密院賀司天臺奏壽星見表

臣某等言。伏覩司天監奏。丙位上占見壽星出見。光明潤澤。謹按景祐乾象新書占曰。老人一星在弧矢南。一名南極。主帝王福壽者。月旅陽中。星昭丙次。前告壽星之兆。迴含明潤之輝。凡遇亨嘉。同歡瑞福。賀中

伏惟皇帝陛下、廣淵成聖、疊穆居尊、恭己當陽、順大中之五事、撫辰育物、協通政之四時、裁成七政之和、嚮用九疇之福、先青祇之中候、見南極之上躔、彌紫宙以收氛、臨黃衢而泛彩、老人垂象、俾下土之觀文、太史獻占、慶後天之膺壽、有光聖日、增煥祥編、臣忝冒近司、預聞嘉應、奉億年之瑞貺、均萬宇之歡心、永保無疆、光昭不朽、

代賀立后表

臣妾言、恭以紹興大寶、崇建長秋、凡在幅員、孰不欣抃、伏惟皇太后殿下、慶鍾沙麓、光協壽房、蘊四德以兼徽、契千齡而偶聖、玉衣之夢、素協于奇祥、金穴之華、早膺于妙選、屬大橫之續服、奉榆翟以正名、抑有典常、允歸謠頌、永正軒龍之體、長扶璇極之尊、與乾同休、配坤惟厚、臣妾無任歡呼屏營之至、

賀奉安三聖御容表

臣某言、伏聞南京鴻慶宮成、奉安三聖御容、禮畢者繼、敝新宮、續成先志、鼓鐘所落、鳧藻相歡、臣竊以別寢之興、蓋尊王業、原廟之設、實廣孝思、稽克構于聖功、兼表崇于文教、光昭宗祏、慶洽天人、伏惟皇帝陛下、凝監太清、紹休聖緒、觀文闡化、握河洛之坤珍、受命宅中、都房心之星次、惟藝祖肇基之地、經先皇駐蹕之巡、特創琳宮、阜安鼎邑、殊庭中廢、宸慮載凝、濬發德音、勃興寶構、森倚萬楹之盛、仰延三后之靈、孝子求神、固非一處、先王不寐、迺懷二人、奉漢寢之游冠、尊軒臺之辟表、龍舟夙發、羽葆親臨、申命禁林之臣、奉寧法物之駕、神明氣象、胥接二京之間、朝野頌聲、共歡千載之際、臣遠守郡土、久去國門、方童觀之

時阻窺朝美。興壤謳之俗。竝樂時康。

代僕射寇相讓恩第一表

絲綸誕告。有命自天。冰炭交懷。弱身無地。中謝竊以宰相之職。政本是毗。寅亮天工。翊宣人紀。上以應泰階之耀。下以副巖石之瞻。當一人注意之求。處百度仰承之地。是故明詢于衆。昆命爾龜。周建公樓。不敢必備官之制。漢盧相府。用以待遠方之賢。蓋倚任之絕崇。在授受而斯允。如臣者。本惟常品。素昧遠圖。幸以遭遇先期。忝塵邇列。偶繼協華之旦。彌敦敍舊之私。爰立巖廊。對掌衡軸。邊戡干之在運。獲覩承平。慙借箸之無謀。蔑伸毗贊。內惟孤直。終荷保全。矧又總職樞庭。聯榮鼎坐。奉循成憲。欽率乃司。齟齬無稱。容容茲愧。猶復授以元戎之旌。纛佩以丞相之印章。節制十連。董齊千乘。離宮司鑰。仍膺冊舉之恩。專閫剖符。更委含岐之壤。名數增盛。眷命有加。實儒素之極榮。豈生平之所望。自知甚熟。享大爲憂。惟恪守于攸箴。亦絕聞于報政。宴安厚味。荏苒流暉。企員闕之百常。居懷就日。奉細書之一札。但謹宣風。比者聖詔遐臨。皇慈俯被。曲承持節之召。俾展執圭之儀。獲面威顏。深諧志願。豈謂遽頒恩制。復委台司。貳西臺內史之崇。升天官常伯之貴。明敷有著。峻舉徽章。聽命以還。撫膺自失。蓋念臣久叨重位。過沐鴻私。論報無階。踰涯既甚。種種之髮。復因病而得衰。諄諄之心。彌畏滿而招損。敢復昧進。重增其尤。豈可再以樛材。玷于柄用。非止尸官充位。瀆乃朝彝。固當速戾傷年。戕其生理。實貪生于盛世。須瀝懇于露章。伏望皇帝陛下。垂諒愚驚。見矜惻款。念隆器之無假。寢茂渥于已行。別擇良能。實諸丞弼。如此。則微臣保量力之訓。庶道人

言公朝得授方之規，無傷國體，傾祈至切，戰悸無從。

第二表

伏蒙聖慈，以臣陳讓恩命，特降批答，不允者，怔營之懇，虔仰于至聰。溫密之言，曲形于優諭，捧讀惶灼，罔知所裁。中竊以讓爵于朝，前經之垂訓，假人以器，往聖之攸箴，矧惟台宰之崇，實居衡軸之地，儻茲虛授，曷允具瞻。如臣者，識昧遠猷，材惟常品，獲遴亨嘉之會，濫塵顯重之資，被眷兩朝，承榮四近，踐陰陽調燮之任，莫代天工，贊夙夜宥密之謀，無裨晝訪，充位之譏，攸集嚮明之願，彌敦乃至授鉞齋壇，建牙戎翰，廁星階之著象，仍玷台儀，剖麟契以長人，蔑揚闡政，洊易鑽榆之序，載深存闕之誠，一節以趨，猥承于君召，介圭入覲，方覲于帝暉，豈謂皇帝陛下，靡間疎庸，曲推圖任，特頒揚庭之命，再升調鼎之司，貳八柄于西臺，冠六卿于會府，洪惟真館，欽奉仙宗，式峻使名，用優寵數，聆深辭之誕告，撫疲質以載懷，神福于謙，實害盈之可畏，民惡其上，且致寇以是虞，爰瀝丹心，仰通尺奏，未動穹旻之聽，益增冰谷之憂，須更露于由衷，冀必回于渙汗，伏望皇帝陛下，念僥榮之太甚，察量力之不遑，申飭攸司，亟停前詔，庶使廟堂高位，免貽不稱之差，犬馬微軀，更荷曲全之惠。

代宋狀元謝及第表〔案〕宋庠及第，在天聖二年，宿卽是勝進士。

太常試藝，謬參籍奏之榮，法坐第名，濫塞言揚之選，沐清光之下濟，仰華旦之親逢，祇荷寵靈，伏增欣懼。

德之集。若乃右賢撫運。左篇隆文。率由上聖之姿。規恢前帝之憲。伏惟皇太后淵猷冠古。景鑠在躬。軒曜儲靈。有成湯之骨法。坤儀納順。茂太姒之音徽。鋪昭正始之風。述宣中壺之化。而自鴻階紹建。寶統嗣興。授玉几之顧遺。財成樞務。總金聲之條貫。登翊聖眞。率循豐茂之規。迄用緝熙之典。故得九清乃睠。萬寶由庚。諸福之物竝臻。至治之隆胥洽。靖共庶位。招致羣廉。舉師俊之彝章。下發中之溫詔。旌賁之命。相望于巖中。物色之求。駢臻于闕下。申飭辨材之制。謹嚴飲墨之規。輟邦直于中司。簡朝英于上笏。光昭盛節。委重斯文。如臣等涉獵有年。削摩無狀。士鄉充賦。偶承乏于計偕。英穀須才。固絕希于聖選。撫空疎而增惕。備程品以奚堪。豈謂宸造曲成。睿思狎至。褐衣賜對。肩帝宇之凝嚴。睿藻躬臨。竦天姿之溫穆。薦登茂級。獲寘榮塗。錫再命之身章。曳婁有煥。頒十行之言綽。雅奧增華。席鴻濡以寢深。委賤質而奚報。臣等敢不愼修履素。惕奉紳書。慕漢吏之惟良。副堯心之在宥。恪居官次。益敦宿業之方。懷畏簡書。彌勵夕冰之節。少酬覆露。共誓捐糜。

湖州到任表

空乏之才。坐塵于冊府。輕凡之質。驟忝于列城。郡望閒華。朝恩光泰。尸承在始。隕越無從。中謝伏念。臣奮自孤生。略無異操。偶階末技。始籍中銓。曾大以來。門業不振。平素所望。器分有涯。叨于誤知。會其乏使。拔從凡品。實之道山。太平養棟之庭。茂彥發礪之所。名臣輩出。卿幹森呈。而臣風譏素淪。藝文特謫。納汙在上。竊吹其中。抱槩十年。無裨至治。挈瓶一介。有玷大猷。頃從舟乘之還。嘗奉銓曹之領。番休延閣之直。趨走

赤墀之塗。亦在序之通階。有宿官之緒業。非不知書筵暇豫。臺職優崇。相與淵雲之徒。樂道堯舜之事。而臣母老垂白。人意戀生。不勝懷土之情。遂有祈天之奏。乞從閒郡。自効薄軀。展其烏鳥之心。慰彼寒泉之思。伏蒙皇帝陛下。賜恢仁覆。推廣孝心。不違之顏。煥生于咫尺。曰俞之命。驟需于穆清。輟七閩之遠藩。授三吳之近地。俯鄰州曲。介在江湖。風土平調。道塗夷近。得以行過廬冢。奉侍版輿。人子至榮。紆蒙少輩。君親大義。論報末階。臣已于今月二十三日。赴上訖。初宜臺劄。稍見城黎。諭聖心在宥之仁。視雅俗如傷之意。而茲土差沃。去歲汔康。比及春來。頗有飢者。未到任前。通判虞部員外郎劉璠。率若勤恤。虔于救存。廣施振業之方。幸無流亡之患。今夏蠶既多繭。麥亦有秋。諒開豐懋之占。深洽熙平之化。戴盆之下。胥燭于天光。鑿井之餘。同均于帝力。而臣下車甫始。去國迢遙。孤于外官。不勤金革之習。任以煩事。又爽宮臺之能。獲守偏方。預班寬詔。勉圖拙者之效。庶逃候人之譏。惟竭愚衷。以對靈施。

蘇州到任表

江海腐生。本惟一介。東南守將。併忝二藩。循幸已多。祇榮惟懼。竊念臣在器凡近。于才樸疎。起自後門。奮從末校。清閒之始。天穀賜收。空乏之間。書林見育。幸預遊于時雋。得仰齒于朝闈。行避蹊邪。志希樹立。終寡適時之用。曷殫當世之宜。亦嘗出領倅車。再懷守紱。竭一心而營職。展四體以從公。幸奉官箴。不累刑史。而門戶多難。年志早衰。入麗正以校書。忽踰五閩。任奉常之博士。凡涉七霜。去歲甫畢喪期。僅存皮相。間關歸國。黽勉服官。會收累稔之勞。且旌羣吏之治。太微郎位。獲登一臺。司會計官。比更兩局。有尸廩稍。

之入。無裨泉賦之贏。然而職業優游。保無玷缺。朝廷寬大。足養資名。清光在瞻。榮塗可企。但以亡親朽骨。久滯橫塗。微臣槁骸。常憂先露。幸中吳之闕守。復故里之與鄰。因瀝血誠。仰干宸聽。伏蒙皇帝陛下。大恢仁憫。深照丹愚。濬發天慈。下從人欲。藩城之任。既席厚恩。臺觀之名。尙塵前職。遠離都輦。訪問路歧。自淮以南。雨水時若。維夏之際。蠶麥善收。便道過家。去月至郡。井絡繁庶。土物清佳。款太伯之遺祠。高風如在。望閭閻之故里。喬木猶存。解舍凝虛。俸入優腆。茲獲寧于血屬。前足治于親喪。秋毫之微。皆出帝力。夕冰之操。彌厲臣心。敢不肅奉詔書。慎司刑典。更徭之役。務恤下貧。輿賦之期。用勤公上。勉圖薄效。用答至恩。

兩浙運使謝上表

祗荷詔除。就承使乏。用過本量。恩越常均。忖己無堪。銘襟增悸。中謝竊念臣才能有限。資名素輕。直由腐生。端遇聖日。因乃末技。玷冒周行。升預書筵。無訂正之益。進參計局。乏鈎校之勤。絕補事經。空尸廩稍。加以不天遘閔。蚤歲喪親。至使遺骸。久在橫壤。常憂先露。貽累後昆。幸蒙曲慈。往俞更郡。俯鄰州里之境。通治閭門之私。申錫告文。聽歸襄事。前後十稔。內外六喪。取資圭田。與耐真宅。釋犬馬之負。頓覺累輕。撫螻蟻之生。未知死所。況非木石之偶。豈膏丘山之恩。方還本邦。復布前誥。寬大之意。一體上仁。簡易之方。仰遵治要。庶奉三年之計。或收一日之長。不圖大恩。超使本道。就頒臺札。加賜庫錢。光照里閭。色動車馬。歷守二吳之地。皆是藩城。就宣一面之風。不離鄉部。以布衣徒步之賤。有畫繡前驅之榮。寵既至而忽驚。感且極而興歎。何則。提封廣斥。輿賦繁并。持按察之權。居澄清之任。方于爲郡之體。不可同日而言。民隱難于

究知官邪資于發摘。游交聯絡于屬郡。親戚布滿于故鄉。人倫則有義有恩。正道則無偏無黨。一斷以法。人且疾其少恩。稍寬以私。衆必譏其弛職。已行之命不可免。至愚之資何以勝。任重才疎。功微賞泰。此蓋伏遇皇帝陛下。天光均燭。雲澤就施。罔遺孤外之臣。謂可東南之使。大君有命而見用。雖出誤知。小臣操心之甚危。敢忘圖報。誓將灰隕。以答寵靈。

代趙漕謝轉運副使表

忽奉中俞。備使外計。人共駭其非據。臣亦慙于罔功。臣猥以謏才。濫膺煩使。一持使節。三易歲華。以其承命之勤。委以救荒之政。凡捐除租賦。使無追呼之擾。與振發食廩。以消流亡之憂。皆聖訓之所裁。顧臣勞之安有。方自陳于疲薻。庶少竊于安閒。成命再加。初心有愧。況臣孤根難植。小器易殫。自顧缺然。無左右游談之助。其誰致此。盡聖神特達之知。恩大難酬。感深以泣。恭惟堯仁宅下。舜智察倫。謂著在三尺之文。莫非寬大。故差擇百城之寄。要在廉平。不維迂儒。亦玷華選。臣敢不祗承德意。遵奉詔條。期在富民。敢較米鹽之細。謹于律下。誓懷冰檠之清。

改左司郎中表

考課四期。增秩二等。龍光游集。榮懼交懷。謝竊念迹本單平。性惟介拙。起于凡品之末。遷此聖圖之亨。猥用徵才。遂叨非據。內廷視草。蓋出于誤知。左掖握蘭。亦緣于虛授。仍尸史局。兼侍經帷。久玷高華。日重大官之費。三蒙宣召。晚躋洛殿之深。榮遇罕階。忠誠自信。上不欺于仁聖。內無愧于神靈。然而才匪患多。學

惟寡要徒輒抽于制命莫宜暢于神規以至審克刑章講修牧政皆上資于聖斷徒謹守于詔文無所建明有慙曠素加以方愚向國孤遠立朝本無左右之容不爲朋黨之計貴游可憚近習罕親常憂三至之言有感四聰之聽方虞幽黜敢冀寵遷豈謂記錄年勤推行恩典進左行之首秩沛內史之榮章竊愧負乘益增隕越此蓋伏遇皇帝陛下曲加金度深諒樸疎施及孤臣擢茲顯級敢不勉思深訓飭厲薄躬務在守官不敢遺力期仰酬于覆露當永誓于私捐

轉官乞回贈祖父母表

臣某言今月十二日閣門告報蒙恩授臣兵部員外郎依前充職者超需崇恩越遷茂秩聳聞成命增忤幽衷懷感之餘無言以寄中謝臣聞天以監觀而爲德其聽孔卑君以威感而受人所愛惟溥矧至仁之御世務廣孝以導民敢率丹愚仰干神睿難寢叫闕之欲預增惓谷之憂竊念臣地緒本寒人資至劣謬操孤技端遇盛辰獲躋仕階過叨從蹕薄才縣力曾裨補之未施厚訓深辭願演裁之莫暢日穰禁林之被歲尸長府之錢豈圖誤簡清衷旁稽陟典愍爲郎之久次特升秩于七兵勞則素愆恩惟加厚當卽虔于制命然內迫于私誠臣曾大以前不及進官歲時所祭未有名稱亡祖臣某祖母某氏越在幼蒙卽承誨育早從厚多常慨先慈而臣遵會享嘉尸承禁近盡事君之節卽受教于樸忠推本祖之言忍獨專于榮寵臣欲乞將聖恩欽授兩資官回贈臣祖父母一官一邑號庶伸愚志獲賁幽局伏望皇帝陛下濟發天慈俯從人欲收曲恩于上閣漏麗澤于重泉魂而有知應當淪骨臣雖不肖敢忘捐軀

文恭集卷十

表

代中書樞密院陳乞御製明堂樂章表

近奉聖旨。令臣等分撰明堂樂章者。崇饗之初。方修於闕典。登歌之首。宜冠于彌文。敢冒大猷。不勝至願。竊以明堂。謂之世室。政教所班。大饗寓于郊宮。理則未正。聖惟善述。道乃從隆。伏惟皇帝陛下。純輯羣元。欽修百祀。馨香嘉栗。以虔郊廟之思。祇戒靜專。以篤神明之接。比承天表之德。大擁時邁之休。然猶增秩無文。益追來孝。企總章之嚴配。卽太寢以薦誠。稽參厥宜。著定其當。合祛天地。參侑祖宗。迴臻變禮之方。滌出淵衷之慮。有司得奉于隆旨。若時絕企于清光。而又度曲制名。納言發德。親承沖旨。爰命具臣。俾牽軋于菲辭。將登參于雅奏。內循疎拙。曷足形容。恭聆明詔之音。一時增惕。深惟盛德之事。千載罕逢。至于寶延泰尊。哀對元聖。必資審律。用播樂章。乃可以交三靈之歡。導百順之祉。甘泉故事。開元舊儀。咸著歌辭。具存篆冊。粵若章聖受元符之錫。祇答榮號。時則徇弼臣之請。親作法曲。一十六章。近則陛下當景祐之隆。率修祀典。居常因聽政之暇。亦製雅歌六十八章。隸習奉常。流傳樂府。以承上下之祀。用膺穹厚之

祥乃今五室既嚴。九筵是度。人祇翹祀。神暫佇香。睿作有先。工歌難曠。其明堂大饗。天地三位。及祖宗三位。酌獻樂章。欲乞聖慈。特從御製。用稽前憲。俯照下情。暫授寶跗。載摛睿藻。薦功祖考。揚德天人。俾肅雍來享。錫之以難老。與猗那長發。摠之于無窮。

代中書樞密院乞乾元節用樂第一表

今月二十七日。入內都知王守忠等。傳宣中書樞密院。爲魏國大長公主薨。將來乾元節。更不作樂者。外館在喪。感深于聖性。誕辰廢樂。昭發于德音。博稽降服之成。參酌祝筵之慶。輒沿衆欲。須冒主聰。伏惟皇帝陛下。錫類纘戎。寶慈立愛。率堯仁而睦族。諧舜孝以導民。敦叙成風。濟惠和于天屬。慎徽流化。恪忠厚于人倫。徇齊蓋本于生知。淳至匪由于外獎。近者魏國大長公主。虧和感疾。收視凝精。診淵慮以焦勞。形至誠而懇到。候間旁午。禳禱駿奔。特紆法駕之尊。躬展家人之禮。泫然流涕。親爲舐腫。極周文之小心。無漢后之難色。掩前王而特出。較至聖而孰能。秦臺終迫于上賓。沁水俄從于東逝。計開屢悼。往臨盡哀。五日廢朝。頻卻大官之膳。千秋彌節。豫停韶樂之音。馳遣近璫。諭宣冲旨。尋禮官之獻議。原主黨之致哀。已除功慘之喪。得承吉祭之事。既立文之有素。于用樂以無嫌。況復華渚誕期。綿區至慶。相趨萬玉之會。大設九賓之朝。重譯所通。遠方皆至。輯瑞之藩侯陪覲。執珍之夷使在廷。稱薦萬年之觴。宜覃一日之澤。薰飴待奏。絳羽侍儀。如停金石之音。懼舐天人之望。形容盛德。本資羽舞之蹈揚。感召至和。實賴鹿鳴之宴樂。犬望皇帝陛下。也尊尊典。稍印至哀。收既生之遺易。順無疆之祝頌。需然憂慮。并一奏于咸英。聖嗣發

晉用參和于夷夏，不勝至願。實望曰俞。

第二表

功服遼慘，誕節卻晉。嘗貢奏函，冀回冲旨。比奉批章之答，未蒙從欲之俞。聆命載兢，仰高增跼。伏惟皇帝陛下，孝思天挺，睿德日躋。履陶唐光被之資，躬天乙懋昭之美。體慈爲寶，撫邦族以咸和。立愛自親，穆朝風而歸厚。近以齊國大長公主，〔案〕前表在未追封日。此表在後。故魏國齊國異稱。晦明生疾，奄忽冥升。棄集鳳之故臺，遶乘鸞于層宇。陛下悼深尊屬，念積諸姑。緬懷賢懿之風，增重稷濟之威。亟傳聖誨，申敕具臣。俯當甲觀之誕期，趣罷宸軒之奏樂。雖天懷之嘉慕，有越常均。而邦典之孔明，未逮往制。非止正期之絕服，已經外次之致哀。比及宴辰，累踰旬浹。以禮文而取正于樂事，而得施自貴主之愆。和比上賓之復魄，乘輿再駕。冠蓋相望，積齋旰之焦勞。虔靈祇之請禱，理迷與善。氣迫歸真，淵衷足貫于神明。至孝增光于列辟，況復誕彌之節，實居朝慶之先。臣工就望以揚休，夷夏駿奔而歸福。安可以闕英莖之薦壽，停金石之備儀。伏望皇帝陛下，勉循至公，少寬寧戚。采容臺之上議，許樂府之奏晉。慰天人欣載之誠，副臣庶祝延之意。惟垂開可以釋翹危。

湖州乞爲太傅謝安置守冢禁樵採表

春秋之記，太上立德。其次立功，謂之不朽。聖人之制，能禦大災，能捍大患，則必見祭。至于封表閭墓，禁止樵採，尋所來而蹇繁，蓋難得而疏舉。雖聖賢相去，事業有間，迹其大指，所以褒德旌功而已。竊見晉太傅

諡文靖公謝安。挺生江表。忠存王室。甫從衡門。未解章帶。已積台弼之器。便繫蒼黔之心。及起東山。相簡文帝。摧桓溫九五之逼。破苻堅百萬之衆。名蓋當世。功濟諸華。號文武之偉人。爲風流之稱首。張文規所撰吳興錄。稱安墓在長城縣南六十五里。初葬建康之梅山。爲陳始興王叔陵發其冢。裔孫夷吾爲長城令。徙于縣南三鴉岡。按長城卽今長興縣。臣昨受詔除出忝州任。到官之日。遂移本縣。訪墳柏所在。據大理寺丞知縣事裴大亮狀。于縣南萬安鄉三鴉岡。訪得安冢。履地十畝有畸。古老相傳。謂之謝墓。田路去縣。與吳興錄所載略同。墓傍社戶十六。歲時祭拜。舊有叢祠。不堪其陋。臣量破公省錢。委大亮移置佳處。重建祠堂。凡屋十二。遣工往塑其像。冠服儀衛。悉用當時之制。然祠墓差僻。人迹罕至。若無給復之守。恐罹樵牧之患。昔信陵濁世之公子。漢初蒙守冢之給。介推霸者之陪隸。晉復啓環山之封。況如安者。高德卓然。雖人隔本朝。功訖前世。穆然清風。猶在庶物。臣每見郊丘所肆赦。前代忠烈立廟所在。莫不申飭長吏。嚴加虔奉。欲乞聖慈。特降敕旨。于安冢旁。申禁樵採。給復五家。以備洒掃守護之役。敕州縣官吏。歲時祠祭。以明聖朝紀元功。褒有德之意。臣預頒詔書。無補風化。干冒冕旒。臣無任祈天俟命。激切屏營之至。

代中書謝詔書止絕內降表

宸襟燭理。明詔宣音。杜邪枉之險蹤。歸公平之正路。欽承睿旨。扑切愚衷。中竊以王道之興。必由正直。國柄之本。實繫賞刑。賞信則內外服焉。治功日起。罰中則羣下肅若。姦慝不生。屬在睿明。張茲紀律。伏惟皇帝陛下。敬施治具。總覽文綱。有聖主黃皮之資。炎王者無私之度。言賞必司。齊燕責之烈。召惠塞臺。黃

百官之臨照。動修前憲。率繇至公。克守盈成。遂底嘉靖。然而承平浸久。涵養益深。儉薄之俗匪敦。進躁之心易動。案公朝而幸進。趨私路以祈榮。或蹈匪彝。自罹常法。規于貸免。陰務營求。實繁內出之文。深瀆至聰之聽。廓然聖斷。嫉此澆風。以爲制治之元。大于一統。蠹政之弊。戒在多門。因成饗于合宮。訖宣恩于層觀。中坦明之定制。塞流弊之濫源。或許自新。庶幾且格。實契澄清之理。足消貪昧之風。臣等忝備近司。親承隆旨。雖無才見。每誓樸忠。敢不仰稟訓言。恪謹條約。交相勗勵。期在遵行。

代中書樞密院謝瑞竹圖表

今月二十二日。使至中書。蒙恩賜臣瑞竹圖一軸者。翠本交枝。駢生于禁囿。絢圖設色。首降于叢霄。啓鈿軸以相鮮。閱青珎之對聳。圭衡兼映。巾衍增榮。祇賀恩頒。彌驚寵賚。謝中伏惟皇帝陛下。惠孚動植。化洽平成。朱草不絕于史書。行葦見歌于詩雅。生物咸遂。本資始于至仁。沖氣爲和。乃薦榮于祥植。瞻言平圃。蔚產脩篁。擢豐壤以同根。出珍叢而異幹。扶疎竝秀。知造物之有功。託寓致靈。表太平之無象。慶昭縣瑞等駢柯。有穆宸襟。興憐妙物。降丹輿而留覽。集華組以臨觀。命繪事以傳模。敷德音而錫與。臣等預瞻秀拔。仍拜章施。懽逢旦暮之亨。交勗歲寒之守。永惟祕奉。益切昭銘。

代中書謝改官表

宗祀明堂
泛恩改官

臣等言。近進劄子。以蒙恩改官。乞寢成命。伏奉今月十三日手書所讓。宜不允者。恩推異等。事出常均。比控丹愚。冀收華渚。終祕允俞之旨。復形敦諭之音。閱琳札之丁寧。被絲言之郁穆。敷誠莫克。祇寵逾驚。謝中

竊念臣等器非宏通。才惟凡近。起白士縫衣之賤。遭丕后席圖之隆。寢竊時榮。遂階弼用。處輔佐綱維之任。當表率士臣之先。雖夙夜戴君。勉竭自公之志。而安危在相。曷膺注意之求。固以聳曠素之深譏。憂負乘之至咎。幸遇竄聰至治。若古攷文。復五室之肇禋。廣六天而合祭。纂戎率義。侑祖及宗。齋戒有初。已卻大官之妙饌。登降攸恪。復虛小次之燕居。故得精志通幽。正陽升景。重陰屏沴。協氣宣和。三神鑒德。以孚休。四海述職。而來助。泛加恩澤。洽被庶工。首從當軸之甄。渙發揚廷之告。參榮宰路。進秩升宮。雖君命之當虔。顧人言之可畏。矧在具瞻之地。敢貪橫施之名。懼校議之或興。非家至而能曉。嘗首陳于底裏。亦面叩于規中。祈寢前恩。庶存小亮。而螻蟻之懇。不能動天。葵養之誠。徒知向日。猥頒書詔。中諭旨辭。謂汗令之已行。形衰褻而彌渥。承命益增于隕越。循牆但極于凌兢。此蓋伏遇皇帝陛下。樂在均釐。釐于覃賞。湛藜蕭之澤。及本芻狗之仁深。超從進律之遷。彌積在梁之刺。敢不欽祇休命。永曷忠圖。庶有答于曲慈。或少逃于清議。

謝敕設表

伏蒙聖慈。以臣入院。賜敕設者。視草充員。方躋于坡禁。班觴示惠。復敝于詔筵。羅方丈之肴羞。融膚寸之醪蟻。才林盛集。囊從畢臻。示恩禮之兼常。被光榮而加腆。此蓋皇帝陛下。嚮儒恢化。稽古上文。厚玉殿之詳延。深複門之賸遇。賜收萬品。召置禁局。逮涓日以祇官。復需雲而覃渥。大官先置。宴豆有加。關鼈署之觀深。增麟樓之赫眀。寵靈過泰。徒醉飽于太平。文采勿昭。詎章施于盤誥。惟圖勤悴。以答褒嘉。

辭免翰林侍讀學士表

臣今月初二日。閣門授到告敕二道。蒙恩除臣翰林侍讀學士者。祇奉褒遷。不任驚灼。竊以參侍帷幄。進讀典文。本優名儒。兼采時望。如臣者。末學膚受。一介野生。無他異能。但逢聖獎。謬加書名。曷暢代言。近以昏瞶。乞補閒郡。嘗傾奏懇。終寢俞音。忽被曲慈。擢升邇列。學術淺陋。職位高華。實匪至愚。所可充選。悅然承命。森若負芒。惟乞聖慈。歷簡耆明。改授鴻碩。庶安危抱。以穆僉言。

謝翰林侍讀學士表

冠居綸掖。久玷清司。參侍經帷。驟羣大雅。仰祇寵渙。伏積兢榮。中謝竊以入奉便朝。進敷往策。膺穆清之顧問。預禁奧之趨翔。無嚴徐之才。不足承于應對。有褚馬之學。乃可奉于諮詢。如臣者。性業顛蒙。才資底滯。記問爲學。曾莫究于言筌。篆刻攻文。絕無裨于治具。端逢亨會。漸竊榮階。歷右史之服官。辱西臺之書命。當彌文之盛際。獲忝代言。乏爾雅之深辭。無施潤色。久簪濫巾之誚。居懷襮被之虞。幸遇皇帝陛下。留好藝文。垂精道術。觀邇英之講勸。廣衢室之訪臨。延集諸儒。究研羣典。豈謂腐生無狀。上睿誤知。升厠近嚴。預陪進讀。陳倚相丘墳之典。參張酺帷幄之臣。職近地親。材朽學陋。將何以助稽古道。開益聖聰。撫末學以空疎。臨多文而眩懜。徒尸清職。莫稱厚恩。伏遇皇帝陛下。恢闡堯文。循持禹律。探觀前史之載。昭鑒是圖。敬求承學之臣。謬延遂及。豈茲庸淺。足副東求。惟當采摘善言。鋪陳往行。庶虔資于一覽。期祇慎于官。

授侍讀學士舉官自代表

右臣蒙恩授侍讀學士。準敕令舉官自代者。臣伏覩尚書兵部員外郎、天章閣待制兼侍講趙師民。學以爲己。善不近名。道術通明。德行純備。有多聞直諒之益。在正始中和之流。久侍講筵。兼聯制閣。儻甄升于禁職。俾進讀于祕書。是能滋廣睿聰。充副德選。

謝宣召入院充學士表

臣某言。今月六日。翰林待詔費瓘至臣所居。奉宣聖旨。召臣入院充學士者。王人俯降。天旨就頒。召置承明之廬。解去邇英之籍。寵褻驟至。榮戀兼深。謝中伏以渙號所孚。禁林爲重。漢家待詔。因金馬以名門。唐世尙才。自鑾坡而移院。官貴近而少輩。地清祕而罕階。深惟視草之難。宜得燃其之敏。豈伊叢陋。足玷禁嚴。竊念臣材拙且疎。器凡而近。出自羈單之緒。遘于熙盛之辰。進忝士科。預尸東觀。守符再假。漕節一持。孤于外宮。介在東鄙。分當文俗之使。絕希翰墨之游。出而誤知。矜其久次。沛然降劄。召言還臺。辱右史之珥彤。玷西垣之書詔。進裨治體。無爾雅之訓辭。坐冒職儀。乏相賓之名實。乃尸朝委。兼攝中銓。僅遵唱注之規。蔑著品題之目。遽從綸省。入侍經帷。陪諸儒之竝游。預羣書之進讀。欣屬好文之會。舉迷摘句之方。訖無忠言。裨于上聽。方虞襍被之汰。遽承出綍之遷。召拜北門。延升近署。申加邇職。參蒞史闡。兼二官之至榮。盡一時之清選。瑣材極陋。寵數踰涯。此蓋伏遇皇帝陛下。假借用人。曲成遂物。誤采頑愚之質。知無左右之容。以其嘗踐掖垣。經爲明命。竄無他技。麤有前勞。擢于禁奧之司。復責演裁之效。矧上清之冊府。俾

方丈之仙山。將何以寓直禁中。備穆清之飭對。誕敷天下。約雅奧之代言。始承命以若驚。終捫心而失措。惟當服勤緒業。率厲愚衷。恪遵四禁之規。祇守十思之愼。用殫志力。以誓粉捐。

舉呂溱王洙自代表

臣蒙恩除翰林學士。準敕舉自代者。臣伏觀起居舍人。知制誥。知杭州。呂溱。蔚登首舉。綽負宏文。尚書工部郎中。知制誥。充史館修撰兼侍講。王洙。號稱俊儒。通明經術。嚮聯詞掖。同掌命書。灼見猷爲。雅欽才望。願停茲命。回授若人。則公議有在。時談允穆。謹具狀奏舉自代。以聞。

代中書謝爲伏日早歸第表

伏日歸休。雖存于告令。中曦趣下。蓋軫于慈襟。祇荷寬優。交增榮悚。謝中伏惟皇帝陛下。紹隆炎歷。凝暨太清。茂遂萬物之宜。變成四氣之順。因天地長風之盛。化洽乘離。屬金火伏藏之初。仁深扇暘。降王人于禁奧。傳天語之溫淳。閱以服勞。許之夙退。獲遂燕申之適。彌昭曠素之慚。

代中書樞密院謝譯經院賜御筵表

節近繞樞。方翻文于竺館。仁深推食。俄示惠于詔筵。聿荷需恩。彌慙曲寵。謝中伏惟皇帝陛下。研幾衆妙。繹志大猷。本上聖之多能。繇中天而稱號。混并書軌。崇護宗乘。重九譯之語言。旁開梵學。正五天之文字。祖述聲源。遶誕節之祝延。奉祕經而演潤。揚妙音而伊始。資睿算以無疆。臣等迹玷近司。才疎了義。臨真筌而曷暢。對豐豆以攸慚。

代中書樞密院傳法院罷堂賜宴表

竺館翻文慶猗蘭之紀節句筵參義譯貝葉以成篇介上聖之元祺續大雄之慧命雖獻如山之祝未登程石之觀梵夾修書愧棲毫之乏潤臚傳敝宴驚兼豆之逾豐臣等匪究真筌空塵譯綴徒尸承于飫賜彌隕越于愚衷

代中書樞密院謝題明堂御書後書名表

伏奉聖旨許臣等所請于御書明堂之門額後各書其名者千齡罕值二寶親逢復得請于曰俞獲附名于不朽榮兼常等感集幽衷中伏惟皇帝陛下炳發彌文紹修宗祀合大神而右饗卽祕寢以告虔泛灑百金之毫出于聖思冠絕六師之體表厥雲蕢迴極奇蹤實昭能事允爲歷代之寶式嚴清廟之藏臣等修輔乏能邁辰爲幸猥承冲旨獲署珍圖仰欽至聖之眷懷益慶具臣之遭會相期勗勵圖報睿明

代中書樞密院謝賜御篆明堂飛白明堂之門表

義畫垂文奎鈞賁采降王人而頒副窺神迹以究奇仰服異恩同懽榮遇中伏惟皇帝陛下聰文攸縱神睿多能嚮屬九房攷制五室並侑祖宗之靈大合郊丘之祀紹興能事濬發精衷聖藻裁篇首發歌于寶鼎宸毫結字復漬墨于金壺揭華榜以相高參飛蕢而並麗選工禁署寓刻祕珉肖鸞龍翔翥之形盡金石昭銘之美恩頒位亡榮及圭衡臣等並邁千齡獲承二寶慙無裨于台宰誓永屬于昆雲

代謝御筵詩表

靈畢疏恩。方啓示慈之宴。寶跼叩寂。忽傳正始之音。竦禹律之鏗純。布堯章之巍煥。百拜同歡于幸會。諸生絕企于清光。靈寵便蕃。營魂隕越。中伏惟皇帝陛下。紹休丕緒。總攬懿綱。聖能之才。蓋本于天縱。光明之學。不待于月將。昭大德以建中。酌彌文而稽古。鶴書赴隴。樂得轂中之英。鳳展臨軒。親詳天下之士。需隆恩而普洎。豁大度以兼收。爰伸晞露之燕胥。載錫起風之宸唱。訓辭深厚。式玉度以彌堅。審制坦明。倬雲漢而竝麗。莫究人神之妙。益知游聖之難。臣等猥以頑疎。違茲全盛。鈞天之樂九奏。已獲聽聞。春山之寶萬金。更容緘祕。敢不述宣聖憲。祇奉洋謨。銘在盤盂。用謹勅天之命。勅于金石。永昭茂世之規。

文恭集卷十一

表

代中書樞密院謝賜三朝寶字訓鑒圖表

天光燭臨。王人降莅。神毫映發。繪事照陳。獲凡目之榮瞻。增愚衷之慶忭。謝中恭以國家自一戎之變伐。經五代之荒屯。文匿采而弗昭。武淫威而未戢。太祖皇帝。削平多壘。式遏橫流。中區始混於車書。生民得去於湯火。太宗皇帝。纂戎以睿。右治在文。躋俗中和之隆。同風魏煥之盛。眞宗皇帝。靜淵疊穆。緝熙光明。協于二后之華。粹乃一王之體。厥初締構。以屬盛盈。聖算成功。彌文盛德。洋洋盡美。蕩蕩難名。至於裁決繁機。奮耀英斷。署鳳毛之尾。擒犀管之英。莫不墨寶相輝。神鋒迴拔。居然鸞鶴之翥。蔚有龍虎之威。祖宗多能。固天之攸縱。聖明善述。歷世而彌光。伏惟皇帝陛下。道德昭前。聰明時憲。規恢祖服。務廣先猷。攷合神書。搜羅遺藁。奇蹤畢獲。顯跡槩探。留聖思于勒成。命侍臣而類次。形于方版之鏤。參諸設色之明。序以宸章。置之禁坐。蓋將訂盤盂之作。況几杖之銘。式遵燕翼之謀。用愼起居之戒。茲惟不朽之事。以永無疆之休。臣叨預宰聯。親逢盛際。禁嚴趨召。已覲寶跼之文。祕副辱頒。有踰拱壁之賜。誓榮藏于衡華。永傳奉于

昆雲。

代中書樞密院謝許御製樂章表

近上表陳乞御製天地祖宗樂章事。伏奉批詔。所乞宜允者。上容作歌。冒適于章。請至聰垂聽。中答于詔。音恭聆曰。俞。相趨載躍。謝中伏惟皇帝陛下。紹休基緒。獨運陶甄。修闕典而勃興。奉先猷而善述。恢張治具。皇建極于大中。總緝禮文。邈同風于魏煥。多能攸縱。衆志必通。天翰載飛。妙龍鸞之翔翥。宸章有作。麗河漢之昭回。鑽仰難名。範圍莫大。屬講儀于宗祀。方詠德于我將。尙祕淵懷。且諭沖旨。敕邇臣而咸述。哀衆議而匪安。以謂紀綱四聲。必資于容律。章施萬物。當賴于慶雲。因露需頭之封。竊祈元首之作。昭明盛德。冠映衆篇。太陽回光。不遺于微養。秋風發詠。許挾于秀蘭。告成祖宗。對越穹厚。韶盡美矣。行覩于來儀。禹無間然。允彰于致孝。天人胥慶。策牘相輝。臣等竊遵亨嘉。無施贊補。獲奉批章之答。併增度曲之榮。

中書乞賜御製表

西清繹志。東壁垂文。幸諸物觀之榮。竊冀恩頒之寵。輒茲披露。倍極震惶。謝中伏惟皇帝陛下。駿惠在躬。亶明宣業。總郁彬而成化。宅淵靜以凝神。堯德始于欽明。被于四表。湯聖由乎修紀。正厥萬邦。克念惟勤。允恭若厲。洪惟元嗣。夙茂英徽。上庠之典式觀。載崇術教。內豎之詢弗置。攸踵溫文。且復歷探前世之規。躬抒竹章之作。聿申慈訓。益懋凝猷。而又儲思濩燮之中。研幾繫象之表。索至精之理。智同于萬殊。宜尙要之辭。體包于三變。金聲迭振。緹帙相輝。與經義以備陳。居爲代寶。兼天常而廣布。用厚民風。而臣等備位。

黃樞侍觀綈几珠璣逖仰。漸測管以非周。瓊蘊悉披。慶出圖之期偶。竊懷聳抃。彌激傾虔。恭祈容照之私。庶適傳家之願。其前御製伏望聖慈各賜一本。所冀洗心祇誦。以獲于漱芳清室。謹藏永期于承式。

中書謝宜赴清景殿觀御書賜宴表

紫闥沖深。綈囊充積。實元儲之善訓。許下士以恭窺。久奉宣游。洊蒙示惠。仰懷殊遇。內積至榮。謝中伏惟皇帝陛下。疊穆御邦。哲明稽古。蘊多能而乃聖。臻大定以無爲。承平佑之祥。奉之虔。羣集累仁之慶。俾厥熾昌。爰崇建于東闈。用固安于大本。若乃孝恭天賦。敏惠日躋。自稟夙成。非由外獎。而陛下深敦慈勗。茂闡良規。攷述作之大方。垂睿明之諄誨。復以章天之御藻。藏府之前編。聿昭齒學之風。竝示賜書之寵。載形中旨。悉念邇臣。趨祕禁之凝嚴。侍威顏之咫尺。瞻壁日重輪之曜。慶偶亨辰。踐玉山四徹之塗。鋪觀典宸辭綺煥。仙翰雲飛。若龜負以攸傳。豈管窺之能測。足使上庠崇術。更廣于多聞。步障題篇。遠慙于懿戒。矧惟邃宇。邈處層霄。飛闥連延。華題照灼。山擬蓬而轉遠。池象壁以縈流。杳絕世氛。龜倖真境。乃閒宴凝神之地。蓋齋居味道之庭。羣帝下觀。百靈潛護。居然物外。理絕階升。猥沐詳延。仍容泛覽。塵眸乍刮。俗骨疑輕。恍若夢于鈞天。飄如乘于鸞駕。而又沛風發唱。堯酒分甘。徵繼屬于良康。浹懽愉于酣湑。鍾千齡之契遇。極三接之便蕃。臣等謬忝近司。無裨至治。荷顧存之尤異。申答效以何階。

謝賜衣服鞍轡馬表

伏蒙聖慈。以臣授前件職。蒙恩賜臣衣一襲。金腰帶一條。金鍍銀鞍轡馬一匹者。祇荷寵榮。伏增悚覲。竊

以與馬之錫。用以飾恩服物之章。茲焉旌禮。瞻言近侍。抑著通規。惟華光拜職之初。均禁林加惠之厚。衣頑御府。馬出王閑。耀驍轡陸離之光。被帶環精麗之飾。實屬思文之后。稽若前猷。寵綏承學之臣。昭茲異數。自匪博通之選。曷膺渥異之恩。如臣者。謬以瑣才。尸于禁掖。莅事積惟煩之誚。不學有將落之譏。實無補于演裁。俄有叨于進讀。已玷近嚴之職。仍兼寶予之榮。乏鄒彥明經之能。慚漢臣稽古之力。徒成妄施。冒報曲慈。

又謝賜衣服鞍轡馬表

複門天近。遂獲兼榮。二閣神深。更容再至。仍拜便蕃之賜。益深俯偃之懷。竊以車服之章。以旌稽古名器之分。戒在假人。自非閎博之流。莫膺蕃庶之錫。如臣者。性未入道。學不經師。語人地則遠孤。論才質而空劣。撫草茅之蕞質。偶值時來。參筆橐之禁聯。豈繇德舉。已叨官于玉署。復增職于金華。仍稽加惠之文。且厚敷經之眷。延英開閣。御府賜衣。上駟之馬。旣閑。載華驍飾。裏蹕之金。有赫。增耀帶環。顧疵賤以奚堪。在寵靈而過泰。曳婁弗稱。彼己爲慚。誓捐一介之軀。以答九乾之施。

謝兼侍讀學士表

命出曲慈。恩加舊物。邇英之籍。絕而復通。禁林之聯。榮而兼綰。省躬非據。承寵若驚。中竊以訪道觀書。聖人之高致。執經摘句。儒者之難才。自非直諒多聞。宏通精識。疇膺顧問。參備侍宸。如臣者。性質樸疎。器能隘薄。起一介之白士。逢千載之亨期。粵自脫巾。寢叨非服。端從右史。亟踐西臺。蒙甄書詔之勞。嘗忝敷經。

之列才不足以宣暢明命學不足以開益睿明甫參西序之榮驟被北門之召一去金華之業寢廢研覃久汙玉堂之居更慚空素固常襍被忽奉如綸再陪大雅之羣重侍便朝之讀自惟膚淺曷奉討論職思其憂心焉如灼此蓋伏遇皇帝陛下特回簡照收採方愚許入廁于衆賢俾嗣修于前職欽惟將聖稟自寬聰羣下莫企于清光分寸曷裨于淵智敢不申尋緒業溫繹舊聞用磨衰鈍之姿少答高明之還

乞贈李昭述官賻卹其家表

臣等伏以甄德表行紀功恤逝聖王之仁政也竊見故翰林侍讀學士尙書右丞李昭述德範純深夙性耆俊行修而才敏氣沖而節和然以賢公之孫名臣之子弈世濟美弱冠立朝臺閣典章多所該識中外事任莫不厭服竭盡近職晚侍經緯志慮益恭年力克壯近緣齋禁嬰疾臥廬端蒙告恩許還私第寢以縣劇遂至隕喪臣竝叨講讀同籍祕嚴常僚之情實憎楚愴愍章之飾輒有控訴伏望聖慈許依近例優贈昭述一官賻卹其家魂而有知死必無恨誓將結草陰報漏泉臣等無任祈天俟命之至

辭免端明殿學士翰林學士兼侍讀表

臣今準閣門告報降到告敕各一道蒙恩授臣兼端明殿學士依舊翰林學士知制誥兼翰林侍讀學士者恩雖特出事本彙征降命自天處躬無地敢叨妄施須叩至聰竊念臣器質隘疎天資樸訥以一介之固陋值千載之休明起自腐生羣于大雅寢叨非服盡出曲慈待對承明之廬進讀邇英之閣徒循持于章句莫開廣于聰明文翰之司一登于方丈禁嚴之地四對于浴堂每惟介拙之才久閱翹英之路未能

引退敢復僥榮。豈謂謬恩。申加近職。況寵靈之過泰。豈名實之相實。若冒榮章。彌速公議。伏望皇帝陛下。濬開俞旨。追寢命書。俾爰極陋之姿。得安至當之分。免貽謗累。更益過尤。惟竭孤忠。以酬鴻造。

謝兼端明殿學士表

祗膺寵渥。伏積兢惶。竊念臣性本方愚。才非秀特。早遇洽平之治。猥塵禁近之司。繼忝崇恩。益升祕職。荷榮名之華疊。愧庸品之孱虛。此蓋伏遇皇帝陛下。敍進羣才。甄揚衆職。遂俾至愚之質。亦叨加惠之恩。惟當竭頑庶幾圖報。

謝授左諫議大夫充樞密副使表

伏奉聖恩。授臣左諫議大夫。充樞密副使。蒙降批答。不允。仍斷來章者。丹赤露中。願收于妄施。穆清在上。終祕于俞音。承命難逃。省躬愈慙。中竊念臣性慚機警。識匪該通。以斷斷之餽生。遶巍巍之至治。謬踐仕版。寢竊書林。器無可養之姿。材非致遠之具。太平樂育。廣施成造之恩。英俊竝遊。最處遠孤之目。以庸受之學。兼體弱之文。擢在絲庭。召置坡禁。參邇英之進讀。濫端殿之兼華。盡出誤知。繼而非服。僥榮尸職。重遇丘山。論功計勞。訖無毛髮。方懼必行之黜。敢冀非常之恩。忽被命書。俾陪宥席。聞詔而循牆以走。撫躬而喘谷如臨。矧茲斗樞。實本兵柄。上贊幄中之畫。密籌徼外之情。必也敏謀。與夫碩望。乃堪聖選。始允師言。今則弗然。屬之不肖。遽陳危懇。仰叩至聰。冀寢謬恩。別咨時傑。控祈雖切。批諭莫從。但俯偃以滋恭懼。負乘之致寇。此蓋伏遇皇帝陛下。至仁博愛。大度兼容。察其方愚。亮茲狷直。知中立之寡黨。憐左右之無

容出自聖心委之機任退省孤臣之分何勝明主之知惟當勗勵忠圖期殫愚筦若虞機括當戒于纖微不出戶庭更遵于慎密庶將盡瘁圖報曲成

謝傳宜入伏早出表

景炎朱火氣匿庚金伏日早歸雖聞著于漢令中曦促下乃特軫于堯仁忽降使璫俯傳天語荷承恩之下暨欽渥旨之曲全謝中伏惟皇帝陛下若古凝猷對時孚化愛溥將之靈命躬博愛之至仁眷乃近司釐茲庶務當炎帝承離之盛矜此服勞推夏王扇暍之慈案扇暍據淮南子是周武王事此殆因借對炎帝故云夏王俾爰夙退去公門之煩溽獲私室之燕申臣等謬以庸虛叨斯密勿竊樂舒長之化彌欽寬大之私

謝羊酒表

臣某言伏蒙聖慈以臣生日特降詔書賜臣羊酒米麪者王人傳詔天語宣恩捧戴有初兢惶無措謝中竊念臣出于單緒起自孤生曾乏異才本繇白望寢竊禁嚴之職過叨內密之司半策靡施寸長莫效徒尸稍食重費殮錢加以享大官之珍甘叨內府之賚予夕冰之懼每積于愚心秋毫之微莫非于帝力負乘爲愧幽黜是虞豈圖當辰之尊特記設弧之旦餽牽加賜醪酒俯霑申以粢醴光于圭臬此蓋伏遇皇帝陛下睿慈曲施宸照周融未捐曠素之臣特舉匪頒之典誓當殞瘁以答寵嘉

又

伏蒙聖慈以臣生日特降詔書賜臣羊酒米麪者使驛馳臨詔綈俯降辱彝儀之豐腴加旅物之便蕃拜

賜爲榮省躬知幸_中。伏念臣腐生少賤。曲士至愚。端遇重華之辰。進竊內樞之任。智謀淺昧。曷陪坐幄之籌。廩稍優豐。益取伐檀之刺。惟名器之踰分。虞負乘之致災。式是仲商。屬茲誕日。設弧感往。列鼎念親。永惟罔極之恩。重愧無庸之質。豈謂伏蒙皇帝陛下。慎隆國體。加惠近臣。醴酒饌羊。籩糲豆米。併爲異數。賚及私庭。等乾坤之施。愧無以報。戴嵩衡之賜。懼不能勝。惟堅忠藎之誠。少答睿明之施。

乞解罷樞密院表

臣某言。近以年力衰疲。目瞶昏乏。乞還機政。嘗貢表函。勿奉詔批。未俞章請。常言加飾。聖度兼容。葵藿寸心。徒知向日。螻蟻微志。未能動天。有迫愚誠。難祇冲眷。竊念臣本惟空劣。特出單寒。自縫掖之諸生。參持橐之近侍。章句末學。不足以名家。篆刻小文。何施于治世。徒以樸疎受性。孤遠立朝。恥朋比之事君。愧浮沈之遂俗。介然自信。軋者固多。誤緣仁廟之知。屢奉浴堂之對。拔于詞禁。置在機庭。未嘗伸幄中之籌。不知更闔外之任。豈能坐制千里。通知四夷。幸賴安平。偶容曠素。伏惟皇帝陛下。入纂聖統。肇嗣寶圖。優假舊臣。寅恭初政。臣每因奏事。親奉德音。患太平含養之深。懲流弊因循之久。垂訪一時之策。規恢萬世之模。盛德難名。清光絕企。而臣少壯之齒。已不如人。衰耄之年。豈能圖國。以至聖之主。責甚愚之臣。夕惕爲憂。任重且殆。仍以犬馬齒載。鐘漏景侵。因陳昧死之章。冀丐餘生之逸。得從謝事。姑遂養痾。而璇指未回。玉音尙祕。彌荷包荒之德。益昭圖舊之仁。然而知止足者。道家之至言。潔去就者。儒生之常分。久貪曲寵。終速多言。伏望皇帝陛下。哀矜陋軀。保全孤節。俯從私欲。俾退仕途。別選耆英。用參機劇。則進退臣節。得

休息于筋骸而本末主恩更薰酣于骨髓

笏記

代中書樞密院謝賜飲福大宴笏記

三神歆鬯甫畢于嚴禋百福在壺式均于愷宴敷宸恩而載洽慶亨會之斯逢伏惟皇帝陛下乘榮居尊宅中建號直房心之華覆卽太紫之祕庭擬制合宮崇饗上帝三后纂戎而竝侑百神啜食以在旁聖志幽通靈貺來答旣成祀而昭孝復式燕以示慈縱魚龍曼衍之觀陳金匏翬庶之樂蓬羞菜列觴醴旨清在上之威顏弗違同伸就望助祭之臣工咸在莫不懽康但醉飽于太平益謳吟于睿聖臣等叨膺宸眷謬備宰司獲上萬年之觴不勝千載之幸徒尸飫賜莫補大猷

謝兼侍讀笏記

祗膺華寵伏積驚惶竊念臣篆刻攻文膚受爲學居自慚于曲士進不至于醇儒幸逢盛辰偶緣末技寢升華近稔服禁嚴預裁內史之書復視北門之草常虞弛職敢覲謬恩忽參進讀之聯彌積兼榮之愧此蓋伏遇皇帝陛下早矜介拙曲賜甄陞惟圖竭盡之誠以答優殊之眷

中書樞密院謝春宴笏記

臣某等言乘執規之春令爰舉舊章示折俎之天慈式陳廣宴展湛斯之晞澤慶樂只之逢辰伏惟皇帝

陛下順斗頒常對時覃惠凝睿思于黃屋惟以靖民均凱樂于春臺未嘗在己屬政機之暇豫因節物之韶妍稽象于需修懽在鎬以謂人神之心洽則天地之氣和大會雲龍之庭高張金石之樂融天壺之御醴溥洽羣臣回日角之睟容俯暉萬物恩既孚于上下禮亦協于冲和臣等忝列近司欣階幸會邇清光而尤密戴至造以何勝

秋宴笏記

嘉觴備物正得秋而萬寶成法展垂衣居其所而衆星拱粲然盛觀生于太平此蓋伏遇皇帝陛下鴻慈自天湛恩濟世洽茲德禮燕及臣工臣等備位何能蒙澤已渥願介萬年之景福共傾三祝于華封

代中書謝秋宴笏記

西成協歷慶歲物之順蕃廣宴班觴示宸慈之昭錫爰修鎬飲允洽需恩伏惟皇帝陛下化穰中區仁孚羣品設衢樽而勵物厚鼎飪以需賢俗阜刑清號網魚之云漏氣調時豫聆銅雀之載鳴華黍由庚景風通正誘淵衷而載懌宜愷澤以咸周金石具陳纓綏竝集妙伎高尋于檀木清歌上遏于雲門瞻黼幄之宸暉已慚形穢聞霓裳之法曲更覺魂驚同歌既醉之篇欣遵寢昌之運臣等忝司樞席叨侍詔筵愧無云補之能但積屬厭之辱

文恭集卷十二

外制

曾公亮可充史館修撰制

敕。夫西臺書詔。東觀約史。三長所寄。二職竝華。選諸彙從之賢。得于綸省之老。某奕世學史。名家通經。體行安于粹和。器用本乎冲厚。博我道術。執經侍于便朝。代予語言。秉筆贊于書命。講聞正論。丕變深辭。屬史氏之缺員。思世官之服采。惟乃踵向歆之美。可以嗣南董之職。噫。立言不朽。書法無隱。傳言後世。勉濟前人。豈不美歟。尙思勉此。

宋祁可依前右諫議大夫充史館修撰制

敕。具官某。國之大典。莫尙于策書。世有史官。實顯于筆削。思立言于不朽。用垂法于將來。亶屬耆英。迺尸述作。以爾學通今古。文擅宗師。識可貫于動微。才足經于治本。曩代言于掖省。復定草于禁林。盤詰之風。炳于三代。訓辭之體。厚厥二京。歷近輔以政成。瞻邇英之籍舊。疇咨勸講。召復近嚴。屬撰次之缺員。冀選掄之任職。絕踰雋碩。參寄編廡。制度文章。用煥一時之美。才流職業。更增二惠之華。有若世官。實惟家學。

尙倚敷經之善。勿忘書法之良。

王洙可守本官充史館修撰制

敕具官某。朕日者。祓飾舊章。修起宗祀。文繁禮縟。德厚流光。乃訪雋儒。使志盛典。思謹合宮之述。用垂來世之傳。以爾經術深明。才辭典茂。居邇英勸。講之近。參東觀討論之勤。博洽多通。精明適用。實膺詔書之舉。通覽奏篇之登。敘次有條。勒成得法。有煥緝熙之美。用嘉刊述之勞。卽太史之書筵。正開元之撰職。仍侍朕講。往踐乃司。

孫抃可依前禮部郎中知制誥充史館修撰判館事制

敕。史官尙矣。歷代有之。述春秋五例之餘。顯邦國四方之掌。必也書法。使善惡昭于前。其次立言。用文采表于後。惟是撰著之美。則宜俊碩之流。具官某。篤行直躬。高文強學。達夷吾治體之要。有壺遂君子之風。曩從西臺。服在禁署。視淮南報賜之草。作伯禽封拜之書。行于諸侯。豈惟謨訓之厚。置諸太史。亦繫職業之長。加復同官之僚。率取一時之望。對執南董之簡。遞煥唐虞之文。緝熙予猷。往踐乃職。

傅惟幾可兵部郎中直史館制

敕具官某。專使一面。將漕之職。修稽最貳期。疇庸之典。舉有嘉顯迹。匪限常規。爰命寵甄。式頒異數。以爾性度和厚。才理幹明。早膺選于峻良。常肆勤于內外。經術飾事。參于儒學之優。法令爲師。尤號吏資之敏。瞻言南服之地。簡求外計之臣。圖其練更。委以按察。招綏有序。控帶得宜。徭俗底寧。邊氓休息。方切仗才。

之寄宜從增秩之留。進屬中臺。佐夏卿之爲政。入聯東觀。預太史之修書。竝服華峻之資。就示褒優之典。尙疑來績。勿墜前勞。

張昇可集賢殿修撰制

敕。進書殿之職。褒藩翰之良。用旌正人。且賞稽古。具官某。高節特立。直躬無徒。試之吏文。則肅給而無望。任以綱錯。則方峻而不回。嚮者有司。坐以薄罪。迫于連茹。委之班條。久從外遷。頗鬱中議。詩不云乎。靖共爾位。正直是與。爾有直諒多聞之益。中立不倚之風。始寵麗正之名。別上朱方之計。惟是朕意。不忘而忠。孫甫可起居舍人制

敕。王者言動。世有記注。雖二史之任差弛。而一時之選愈華。非得名流。不允清議。具官某。學精識遠。才美行方。辯論有餘。介特不撓。擢在延閣。任之諫垣。鯁議讜言。未嘗吐茹。清規直質。不見緇磷。屢易守符。再典潛事。風政彌舉。器望益嘉。差用久勞。稍遷右史。尙倚將輸之舊。就虔褒擢之恩。

錢彥遠可起居舍人直集賢院知諫院制

敕。具官某。夫納忠之先。莫若箴王闕。興治之美。無如任諫臣。爰推渥茂之恩。用獎正方之士。質之公論。咸曰職修。以爾風識。既周才謨。兼劭以富平之德器。出太伯之世家。紹休前人。協比介弟。聯對大策。著聞本朝。敷奏其言。咸有補于世務。參試以政。復無害于吏文。嘉其行能。任以言責。議論慷慨。退公委蛇。獻納既勤。旌陟宜及。古史之任。參記言動。麗正之學。領校典文。舉用二職之華。進增七諍之重。爾其勿念後悔。無

廢前勞。審思諸宜。勤補不逮。謹言切至。朕罔咈焉。

李兌可起居舍人同知諫院制

敕具官某。夫有言責者。思其忠。有官守者。修其職。保氏之任。則主進諫。右司之業。則司書法。均是二職。皆拾遺補過之臣也。自非忠正之士。疇勝左右之選。以爾莊修有素。方介不撓。比膺憲屬之選。進處臺端之嚴。糾肅朝聯。切劘治體。間陳得失。頗見納用。有嘉已試之效。且酬久次之勞。寵以記言。委之諫職。爾其往服休命。數進苦言。深圖薦替之勤。勿爲拱默之計。周爰補察。以竚來忠。

陳升之可右司諫制

敕某。朕設置諫臣。所以箴已闕。詢求正論。所以廣治道。以爾蔚有文采。參以風議。更試外服。則材彊濟而有餘。察視中司。則體端直而無撓。比奏方幅。數進忠言。能切劘于事經。多鐫拂于時病。適會諫員之缺。超從憲屬之選。往踐厥官。亟修乃職。至于刑政之得失。言動之過差。悉意以聞。無有所諱。

呂溱可右正言制

敕具官某。漢儀以諸吏給事于中。唐制以兩省供奉于內。惟是右垣之選。則拾禁闥之遺。自匪髦良。參濟風議。朕未嘗輕以授之。以爾神遠而清。體重且粹。勳繇異等之舉。過置禁林之華。參職朱轡。再珥彤筆。一遷秩於祕局。久藏器於高墉。介然有常。議者爲滯。茲用擢汝。置之諫聯。行圖記載之勞。勉思獻替之最。

李執中可著作佐郎制

敕具官某、國家設攷課之法、立準才之品、較實有狀、陟乃近明、進懋以官、賞則無濫、以爾早中辭策、嘗參賓籓、間緣保任之章、來稱敏濟之用、使幹若局、參預縣章、質其滿歲之勞、合於班賞之格、京司進秩、書省爲清、俾升刊著之華、無廢操修之素、

呂誨可著作佐郎制

敕某、昔爾大父、相太宗眞宗、厥功茂焉、惟時穆若、以爾有裔孫之裕、策雋科之秀、率循士範、參試吏文、任宰字而有勞、歷終更而無缺、監司薦狀、鈎覆應條、擢佐修書之筵、且光名相之閱、圖濟前美、滋勉來勩、

向安可著作佐郎制

敕某、本縫衣之流、預入穀之選、早服名教之樂、亦尙文辭之爲、幕府參謀、首在公匪懈之敏、藩房授道、有惠訓不倦之勤、覽大宗之上言、合公車之衆奏、在勞可紀、于法得遷、俾領著于祕丘、尙竭誠于親邸、

高師說可著作佐郎制

敕某、朕以吏員實繁、治迹難究、故設保任之法、委諸按察之官、旣得公車之章、復經選部之覆、審若薦狀、差以恩遷、以爾用軍從事之秩、辟在幕府、時則留司、乃吾舊相、薦爾沈密有守、強幹克舉、一德之重、可以取信、故特命引對、不與他事、比擢任京局、領佐史筵、往愼爾修、以永來譽、

宋敏修可著作佐郎制

敕某、著局有佐、隸修書之任、故事到職、作名臣之傳、非擇才者、疇稱官美、爾之先正、歷居史任、爲一時之

宗匠成兩朝之典冊。不朽之立。厥功茂焉。爾承前人。能世家學。二惠競爽。見推於時。來賀歲成。兼優最日。差用陟典。擢預史筵。往知朝恩。取大門業。

張演可著作佐郎制

敕某。選部之條。黜陟有序。清能見拔。滯淹者振。器乃無廢。才則弗遺。以爾少有俊名。早中科選。家世高于閩錄。閱閱滯於中銓。浩然之氣。老而彌壯。曷隨越絕之檄。預參賓幕之籌。薦任交章。終更無缺。擢佐史筵之著。尙繁文繹之餘。虔我茂恩。勉而甘節。

路保衡蕭汝礪竝可著作佐郎制

敕某等。國家以治世之典。宜崇寬簡。故延尉之屬。必選仁平。爾等階升俊科。兼練法學。比參府畫。亦總縣條。徇公不私。以文無害。被所知之章薦。閱已世之案文。悉通爰書。且有比例。對遷列署之秩。竝居詳讞之曹。勉思盡心。以稱朕意。

張子方萬稹竝可著作佐郎制

敕某等。曩繇賓興。早擢科等。比會都銓之集。屢試吏牒之煩。咸用節尙之修。胥被已知之薦。治縣著迹。幹局有勞。略其往疵。攷以今課。宜寵祕丘之秩。往佐修書之筵。勉推精誠。務對恩典。

范道卿鄭夔金君卿竝可著作佐郎制

敕某等。佐著有局。本隸修書。令名雖存。舊職已廢。猶曰美秩。必用清流。爾等體行交修。才辭參劭。竝繇茂

士之選號爲從事之良。或賦縣條。竝蒞局事。或因滿課。來集都銓。實無尤爲。多有慰薦。既合攷法。仍中賞科。命除此官。且申吾信。切近朝藉。益思官箴。

周岐可著作佐郎李昭錫可大理寺丞制

敕某等。夫華原演雍。有秦之遺俗。故號爲難治。趙城近晉。染堯之深迹。故稱爲易化。爾等端莊有立。廉敏自將。長治二邑之民。操決一同之政。雖劇易殊貫。而功次略同。復有薦任之函。合于甄陟之典。以文而進。佐祕丘之撰著。治經以仕。參列卿之丞屬。均自清要。往哉慎修。

陳亢可著作佐郎邢裕可大理寺丞制

敕某等。漢之法。有最課而得遷。晉之令。坐優舉而乃陟。國家開薦任之例。委監司之官。擢敘則精。才否尤辨。爾等。或用材質之美。揚于王庭。或以經藝之優。廢我人爵。佩縣銅墨。爲郡紀綱。治有愛利之風。官無遺曠之事。需章難薦。選部修聞。領著祕丘。決平讞寺。竝爲磐陸之漸。勿忘風矩之修。

周約可著作佐郎郭灝可大理寺丞制

敕某等。同升茂士。分踐俊科。比沿牒以肆勤。識治庖之效智。樹風遠邑。綰務要津。政條以修。局事無壅。監司之薦。應法銓審之較。中科入著祕局。進丞讞寺。竝居美秩。咸服茂恩。

陸絳可著作佐郎張靖鼎堯竝可大理寺丞制

敕某等。邑大夫司百里之命。郡督郵秉一州之綱。二者之任則均。三人行各異。以爾絳。名有幹局。得諸

才施舉將爲多治縣有迹以爾靖通法家之學以爾堯本經術之明吏資竝深官簿無缺終更赴集鈎攷應書參丞理官用信吾賞有以自效勿替厥修

何世昌可著作佐郎陸若濟劉寅張齊古竝可大理寺丞制

敕某等嘗升論秀之科亦階任子之法竝濟公路數調銓臺鼎臨樅木之酤胥及連教之掌或絃歌而字邑或書檄而從軍咸能飭厲廉規敷宣敏力交章入薦計最居高賞格具存陟恩宜沛佐修書者祕丘之美秩承治讞者列寺之要官榮序有開班朝孔邇勉固後凋之節以期遠至之塗

宋垂範可著作佐郎王堯臣杜松張知常竝可大理寺丞王景華可衛尉寺丞制

敕某等大選之法六歲坐優舉乃得從有司鈎攷便坐臨覆隨其功狀陟之京司故才弗及遺而器無滯用爾等或廉茂進官或高華取資從政郡邑之間服勞事局之次治有最目課應陟書覽薦牘則居多視素履則無缺祕丘領著列寺爲丞竝日美遷尙期來效

吳英可著作佐郎陳世卿可衛尉寺丞楊希古沈紳孫祖慶竝可大理寺丞制

敕某等或預楊庭之選或藉高門之資同入銓流分幹吏治參畫著敏撫字有勞善勾邑版之稽能盡地力之教外則大使之薦難之最迹內則選部之覆審如計文終更若茲褒勸宜爾入領史官之佐往服廷尉之丞進參衛屯胥列京局宜慎榮塗之漸勿令素履之渝念報已知當虔吾訓

孫諮可著作佐郎王師旦王震朱彭竝可大理寺丞夏侯維可衛尉寺丞制

敕國家著定攷法。差進銓流。壹責監司之官。參稽保任之法。省審既正。遷陟乃宜。以爾等或州舉升科。或世資補吏。除軍從事。爲郡決曹。領算商車。典臨茗局。職修課舉。行敏節廉。按察之薦條聞。鈎校之司覆實。書省有佐。卿屬置丞。竝從臺格之遷。益虔朝寵之茂。無易而守。更效其來。

前石州方山縣令王佐可著作佐郎前泗州盱眙縣令吳天常睦州司法參軍前監温州在城商稅務傳變竝可大理寺丞制

敕某等。久從掾令之職。咸有幹廉之稱。使者交章。攸司覆實。言爾最狀。甫應遷科。朕親御便廷。嘗相其實。可以才使。因而敘遷。進屬上臺之聯。益思良吏之守。

王度可太子中允牛知新可著作佐郎張奭可大理寺丞制

敕某等。朕欲濟官政之宜。究吏人之迹。故責在保任。而壹于監司。爾等或奮藻賓興。或治經進官。參被邦侯之選。典司都獄之繁。行已有方。服官無缺。薦論狎至。鈎校率同。差次資名。褒進秩序。惟承華之屬。通文石之朝。典著祕書。持平列寺。彙征以進。胥愼而修。勿蹈匪彝。益思自效。

郭評可太子中舍人李偉可大理寺丞制

敕某。春坊允僚。比東臺之封駁。秋卿丞屬。佐廷尉之讞疑。或顓用才流。或參選吏幹。以爾等修辭入第。預軍從事之招。治禮得科。歷郡決曹之任。外章交薦。滿課終更。質諸銓條。灼有治狀。宜寵承華之秩。往司李法之書。彌勵來勳。勿更前守。

劉孝忠李允中竝可太子中舍人劉炎可殿中丞制
敕某等早階科等之升或緣蔭格而仕績勤官簿升屬法卿分守二邑之氓顯司一局之利條上最目協
應陟書宜進承華之僚入丞中盾之省益樹風迹以對寵靈

